

رواية

فتاة أشلول

بالعامية المصرية

تأليف

السيد عبد الكريم

إهداء

إليها ...

السيد عبد الكريم

الفصل الاول

من أكبر المكاسب اللي كسبتها من سنوات الجامعة هو صديقي شاكر ...
كان دمه خفيف وابن بلد واجتماعي ... واكثر حاجة كنت بحبها فيه انه

موسوس زيي ، ورغم اننا تخرجنا من سنين لكنه لسه بيزورنى فى قرىتى ... عامة هو ساكن فى قرية قريبة منا ناحية الجبل ... مفيش عيد ييجى الا أما ألقى شاكرك جاى يقضى معايا يوم... ونفضل بقا نتكلم ونهزر ونضحك ونفكر أيام الجامعة ... المرة دى جالى قبل العيد بـ 3 أيام الساعة 9 بالليل ...وقالى انه هيسافر القاهرة بكرة الصبح علشان كده جاى يعيد عليا ويشوفنى قبل ما يسافر ... وبالصدفة واحنا بنحكي قالى ان القرية بتاعته مقلوبة بسبب اختفاء سيدة اسمها سعاد شوقى ... والشرطة حققت مع جوزها لأنه ديما كان على خلاف معاها وكان بيقول انه هيجوز عليها ...المهم تكلمنا فى حاجات كتير وقضينا السهرة وعلى الساعة 12 بالليل شاكرك مشى ... تانى كنت سهران بالليل واسترجعت زيارة شاكرك فى دماغى ...لاحظت ان شاكرك كان متغير شوية المرة دى ... شاكرك اكل معايا سمك وانا عارف ان شاكرك مش بيحب السمك ولا بيطبق ريحته ... كمان هو اول مرة ييجى يزورنى بالليل ... لان الطريق بين قرىتى وقرىته تعتبر مهجورة وكلها ارض زراعية ومحدش بيمشى فيها بالليل ...المهم قلت لنفسى جايز هو اكل سمك علشان معملش له اكل مخصوص ...وجايز جه بالليل لانه بيستعد للسفر ومعندوش وقت ...المهم جه العيد ونسيت الموضوع ...وتالت يوم العيد اخدت فراخ ولحمة وفواكه ورحت ازور اختى المجوزة ...هى مجوزة فى قرية بعيدنا بحوالى 20 كيلو ... وقعدت عندها لحد الظهر ... وقبل ما امشى جوزها جه وحلف لأقعد معاها اتغدى ...وعيال اختى مسكوا فيا واضطريت اقعد ... والغدا جاب عشا والوقت اتأخر ...انا كنت عاوز اروح بدرى علشان الطريق كلها مقطوعة ...وانا من النوع اللى بترعب من الطرق المقطوعة ...ومشيت من عندهم على الساعة 10 بالليل ... ركبت الموتوسكيل بتاعى وتوكلت على الله ... وعديت أول قرية بين الزروع والغيطان وانا مولع النور العالى بسبب الضلمة اللى فى كل مكان ... وبعدين الموتوسكيل وقف فجأة ...طيب ده وقته؟ نزلت اشوف فيه ايه ...وحاولت اشغل الموتوسكيل لكن مفيش فايده ... عدت ربع ساعة والموتوسكيل مش عايز ينطق ... بصيت حواليا واكتشفت انى فى مكان مقطوع كله ضلمة وسكوت ..لا فيه بيت قريب ولا حد معدى ولا اى حاجة ... فضلت اجر فى الموتوسكيل لمدة نص ساعة وبعدين قلت أجرب أحول البنزين على الاحتياطى وفعلا الموتوسكيل اشتغل ...طيب ازاي مجتث على بالى الفكرة دى ؟ لانى كنت خايف ومرعوب ...ركبت الموتوسكيل وانا بحمد ربنا ...وبعد شوية شفت عربية مركونة شكلها مخيف اوى ... وشفيت واحد بينزل من العربية وبيص حواليه ... انا كنت

بعيد عنه بس شايفه ... الغريب ان الراجل طلع من العربية شوال مربوط
... انا طفيت نور الموتوسيكل بسرعة علشان كنت خلاص قربت منه
... وطفيت الموتوسيكل وانا بترعب ... انا كنت خايف يشوفنى ... ومش
عارف ده اصلا انسان ولا عفريت ... الراجل ركب العربية تانى ومشى ...
شغلت الموتوسكيل ومشيت وانا اقرأ قران لحد الحمد لله ما وصلت البيت
... غيرت هدومى .. وبدأت افكر فى اللى شفته ... بس حسيت ان اللى شفته
ده مجرد تهيؤات ... وقبل ما نام لقيت اختى وجوزها بيتصلوا بيا بيظمنوا
انى وصلت ولا لسه ... طمنتهم ونمت ... وصحيت الساعة 2 بالليل على
صوت جرس التليفون ... كان رقم غريب ... ولما فتحت وقلت الو
... سمعت صوت واحدة بتقولى (عند العربية) قتلها النمرة غلط وقلت
السكة ... بس رجعت أركز فى الجملة اللى قالتها ... (عند العربية) ؟
معناها ايه ؟ ... اترعبت لما افكرت العربية اللى شفتها فى الغيطان ...
حاولت انام لكن خلاص النوم طار من عينى ..مسكت التليفون واتصلت
على الرقم .. لقيت اللى رد عليا جوز اختى اللى كنت عندهم .. اعتذرت ليه
انى رنيت عليه بالغلط لان الساعة كان 2 ونص ... وفضلت ادور على
الرقم اللى اتصل بيا لقيته اختفى .. اخر المكالمات عندى كلها اسماء ناس
اعرفها ... مفيش ولا رقم غريب موجود فى سجل المكالمات المستلمة
خالص ... بسم الله الرحمن الرحيم ... هو انا اجننت ولا ايه ؟
فضلت صاحى لحد ما صليت الفجر ونمت .. وعدى اليوم عادى ونسيت كل
اللى حصل ... بس تانى يوم بالليل رن عليا رقم غريب ...مسكت التليفون
وانا ايدى بترعبش وقلت الو ... سمعت نفس الصوت بيقول .. (عند العربية)
.... قلت وانا صوتى مبجوح من الخوف :
- انتى مين ؟
قالت : انا سعاد شوقي .

الفصل الثانى

لما سمعتها بتقول (سعاد شوقي) حسيت ان الدم اتجمد فى عروقي ، شاكر
قالى ان الست اللي اختفت فى قريته اسمها (سعاد شوقي) ، دا معناه ايه؟!
انتبهت انى لسه حاطط الفون على ودنى ، قتلها :
- سعاد شوقي مين ؟

لكن مكنش فيه رد ، وكالعادة لقيتها قفلت السكة ، طبعاً مش هدور على
الرقم لأنه أكيد اختفى ، الموضوع مش محتاج نكاه يعنى ، عملت كوباية
شاي وولعت سيجارة واتصلت بشاكر ، وقتله :
- الو .. شاكر

مش عارف ليه حسيت ان صوته ضعيف لما قالى :
- أهلا رأفت .

قلت وانا متوتر :

- فينك يابنى ؟ ... جيت من السفر ولا لسه ؟
قالى بنبرة فيها استغراب :
- سفر ايه ؟

قلت :

- مش قلتلى انك مسافر للقاهرة ؟
قالى ولسه نبرته فيها استغراب :
- وقتلك كده امتي ؟

قلت :

- لما كنت عندى من اسبوع ... ساعة ما أكلنا سمك يا شاكر .
قال :

- وكمان سمك؟! يابنى انا عامل حادثه من اسبوع ولسه خارج من
المستشفى امبارح ... ودا السبب الى خلاني ما جيتش ليك يوم العيد .

لما شاكر خلص جملته سمعت صوت طبق وقع فى المطبخ ، طرت فى
الهوا مترين والتليفون وقع من ايدي ، دخلت المطبخ لقيت القطة موقعة 3
طباق على البلاط ، سبتها ورجعت الصالة ورنيت على شاكر تاني وقتله :
- شاكر ... انا هجيلك الصبح.

تانى يوم الصبح ركبت الموتوسكيل الغلبان وطلعت جري على بيت شاكر ،
كنت عاوز اقابله فى النهار قبل ما ييجى الليل والست دى تتصل بيا تاني ،
أبو شاكر رحب بيا لانه كان يعرفنى ودى مش اول مرة ازروهم فيها ،

ودخلت لقيت شاكر نايم على السرير ورجله مجبسة وايده متعلقة فى خيط مربوط فى رقبته
- الله يخربيتك ..دا انتى متعور بجد ؟
قالى وهو يحاول يقوم :
- او مال دى فيها هزار يعنى
طلبت منه يخليه مستريح وشربنا الشاي وحكيته على كل حاجة ، بس كان رده غريب ، قالى :
- ياعم سعاد مين؟! البلد كلها متأكدة ان جوزها قتلها وتخلص من جنتها .
كنت مستغرب من رد فعل شاكر ، خاصة ان شاكر موسوس أكثر منى ،
يعنى سبحان اللى جمعنا على بعض ، انا ممكن اصحي بالليل 7 مرات
أشوف نفسي طفيت نور الحمام ولا لاءه ، رغم انى بكون متأكد انى طفيته
، شاكر بقا موسوس أكثر منى ، المهم قتلته :
- بس انت جيت عندى البيت وسهرنا وأكلت سمك ..قول انك جيت وبتعمل
فيا مقلب .
طلع علبة السجاير وقدملى سيجارة وقالى :
- وانا من امتى باجيلك بالليل؟! ومن امتى باكل سمك؟!
قتلته وانا بطلع دخان السيجارة فى وشه من الغيظ :
- ما استحالة تكون تهيئات .
قالى وهو بيبتسم :
- فعلا مش تهيئات ... هى وسوسة .
قتلته وانا متغاض من بروده :
- على الطلاق ما وسوسة ، انت بشحمك ولحمك جيت سهرت معايا يوم
الخميس قبل العيد بـ 3 أيام وقتلتى انك مسافر القاهرة تانى يوم الصبح .
هنا شاكر نادي على والدته اللى دخلت وسلمت عليا ، شاكر سألهأ قدامى :
- هو الحادثة كانت امتى يا حاجة ؟
- متفكر نيش يابني باليوم ده وقول الحمد لله انها جات على كده ، دا انا كنت
هموت فيها لما عرفت الخبر
- بعد الشر عليكى يا حاجة

ماشاء الله ، شاكر وأمه مستمتعين بوقتهم وانا مشلول من الغيظ والحيرة
والرعب ، المهم الحاجة قالت انه عمل حادثة يوم التلات ، ودخل المستشفى

ولسه خارج امبارح ، وشاكر ول عامل فيا مقلب استحالة امه تكون
 مشاركة معاه يعني ، المهم قبل ما امشي من عند شاكر قتلته :
 - شاكر ... اللي جالي ده عفريت ... عفريت كان عايز يعرفني ان فيه واحدة
 اختفت من قرينتك اسمها سعاد ... علشان انا اللي احل اللغز بتاع الراجل
 اللي شفته في الغيط بالعربية
 قالي وهو بدأ يهتم بالموضوع :
 - تصدق انا نسيت اسألك انت عرفت ازاي موضوع سعاد اللي اختفت .
 قتلته وانا بقف علشان امشي :
 - انا هطلع من عندك هنا على قسم الشرطة
 سمعته بيقول وانا خارج :
 - استنا يا غبي ، اصبر أما أخف واروح معاك .

بعد ساعتين كنت في قسم الشرطة ، كنت برتتش وانا بحكي اللي حصل
 معايا ، لدرجة ان الضابط طلب من العسكري يجيبلي فنجان قهوة علشان
 اهدي ، ولما ولما خلصت الحكاية لقيت الضابط بيدوس على زرار على
 مكتبه ، وبعد شويه دخل مجموعة من الضباط المحققين ، عرفت بعين
 انهم كانوا ماسكين قضية اختفاء سعاد شوقي ، المهم حكيت الحكاية كذا مرة
 ، وعرفت بعين انهم كانوا متعمدين اني احكي الحكاية كذا مرة علشان
 يشوفوا هحكيها كل مرة بنفس الاحداث والتفاصيل ولا هغير فيها ، بس في
 الاخر محدش اهتم بالموضوع وواحد منهم قالي :
 - احنا افرجنا عن جوزها فرغلي ، وحكايتك مثيرة للاهتمام ، بس اللي
 فهمته منك انك معندكش اي دليل
 قلت بانفعال :

- بس اكيد اللي شفته في الغيط ده هو القاتل

سمعته الضابط بيقول :

- طيب معاك رقم العربية اللي شفنها ؟

طبعاً مردتش عليه لاني شفت العربية من بعيد وكنت في قمة الرعب
 ساعتها ، الضابط كمل كلامه :

- طيب معاك رقم البنت اللي بتتصل بيك وبتقولك انها سعاد ؟
 قتلته :

- رقمها بيخنتني بعد ما تقفل .

قالي :

- اه بيخنتني ... بيخنتني .

وبص فى ارواق قدامه وفضل يقلب فيها ، ساعتها عرفت ان المفروض وقتي انتهى ، وفعلا مشيت .

فى نفس اليوم بالليل كنت سهران بشرب شاي وبدخن سجائر ، كنت متوقع انها تتصل ، بس الساعة جات 3 اخر الليل ومتصلتش ، ساعتها قررت اني انام وقلت فى نفسي جايز يكون كل ده تهيؤات وهم عندهم حق ، ويدوبك حطيت راسي على المخدة وسمعت الفون بيرن ، وبسرعة ولعت نور الاوضة وطلعت القلم والورقة اللي كنت محضرهم ونقلت الرقم ، ما هو مش هفضل عبيط طول عمري يعني ، كده انا معايا دليل ، رقمك معايا ياست سعاد ، المهم لما فتحت الاتصال وقلت (الو) مسمعتش اى رد ، فضلت اقول (الو) لحد ما ردت ، كان نفس الصوت بس المرة دى قالت جملة خلتنى اتجمد فى مكاني ، قالت :
- متبقاش جحش ، الرقم اللي كتبتة مش هينفعك ، وبلاش تعرف شاكر بحاجة ... عند العربية .

الفصل الثالث

بس المرة دى قالت جملة خلنتي اتجمد فى مكاني ، قالت :
- متبقاش جحش ، الرقم اللى كتبتة مش هينفعك ، وبلاش تعرف شاكر
بحاجة ... عند العربية .

لما سمعتها بتقول كده أبعدت التليفون عن ودني وفضلت أبص حواليا ،
تهيألي لثواني إن الست دى موجودة معايا في الأوضة ، كانت القرية كلها
نايمة والسكون زى سكون أهل المقابر ، وسمعت صوت مواء قطط
بتتخاق ، مكنتش متأكد ان الصوت ده صوت قطط ولا مخلوقات عاملة
نفسها قطط ، الله يخربيتك ياسعاد الزفت ، انا بقيت بشك فى كل حاجة
بسببك ، يعنى انتى ملقنيتش غيرى فى القرية كلها ، جيتى للواد الشاطر
أقوي ، هى ناقصة وسوسة يعنى ، فتحت البلوكونة ابص على القطط
مشفتش حاجة ، وبما اني ساكن لوحدي فى البيت بعد وفاة ابويا وامي
وجواز اختي فتلاقوني لو سمعت اى صوت ميعرفش أنام إلا لما أتأكد من
مصدر الصوت ، المهم لما انتبهت للتليفون كانت قفلت السكة طبعاً ، رميت
التليفون في قرف على السرير ورميت نفسى جمبه ، وفجأة افنكرت حاجة
مهمة ، أنا كتبت الرقم ، ايوه أنا معايا رقمها دلوقتي ، طلعت الورقة وأنا
حاسس بفرحة اللمبي لما فتح محل كبدة وكان فاكر نفسه هينجح ، بس زى
ما اللمبي فشل يا بني ادمين أنا كمان فشلت ، لقيت الورقة مكتوبة فيها (عند
العربية) ، بسم الله الرحمن الرحيم ، ازاي حصل كده !؟

اقسم لكم بالله أنا كنت كاتب رقمها ،

ازاي رقمها اختفي وظهرت الجملة دى !؟

الغريب ان جملة (عند العربية) كانت مكتوبة بخطى ، يعنى أنا بدل ما
اكتب رقمها كتبت الجملة دى ،

بس ازاي يا ربي !؟

ازاي حصل كده !؟

عرفت ان الليلة مفهانش نوم ، دخلت المطبخ اعمل كوباية شاي ، ويا سلام
مع كوباية شاي وسيجارة وأنت بتفكر في العفاريت !

متعة اكيد بتحسدوني عليها ، اممم ، ايه اللى انا بقوله ده ، انت اتجننت
رسمي يا رأفت ، بدأت أركز كده وأحط الاحتمالات علشان اعرف احل
الموضوع ، يعنى اللى بيطلعوا على قنوات الكورة بيحللوا أحسن مني في
ايه ؟ كل تحليلاتهم بتطلع غلط في الاخر ، المهم بدأت أحط الاحتمالات ،
ووصلت لنتيجة إن الست دى عاوزانى اروح عند العربية ، والمكان اللى

شفت فيه العربية بعيد عن قريتي بحوالى 14 كيلو متر ، وطبعاً او عو
تتوقعوا منى انى هروح ، انا مالي ومال اللى اختفت ولا اتقتلت ؟
بس هنا جاتلى فكرة مجنونة وقررت انى اعملها ، يلا تصبحوا على خير
علشان هنام وبكرة الصبح هتعرفوا الخطة .

تاني يوم صحيت ولبست نضارة شمس كانت معايا من أيام الشقاوة لما كنت
بحاول أوقع بيها سعدية فى حبي ، ملحوظة يا اللى بتضحكوا ، سعدية
دلوقتي معاها 3 عيال ، المهم لبست ونزلت اخدت الموتوسكيل الغلبان
بتاعي وطلعت على قرية شاكرا ، مكنتش رايح عند بيت شاكرا ، فضلت
امشي فى الشوارع القروية لحد ما لقيت شوية عيال بيعلبوا ، ناديت على
عيل صغير وسألته :

- بيت عمك فرغلي فين يا عسل ؟

الواد بكل غلاسة قالي :

- هات خمسة جنية وأنا أقولك .

قلت فى نفسي (يلا هى جات عليك يعني) .

طلعت خمسة جنية واديتها للواد وانا مبتسم ، الواد فرح أوي لما مسك
الخمسة جنية فى ايده وكأنه مكنش متوقع إنى ممكن اديه ، فعلا الأطفال
أحباب الله ، وأنصحكم تعطفوا عليهم ديما وتدوهم فلوس ،
الواد حط الخمسة جنية فى جيبه وجري وهو بيقول :
- ضحكت عليك ... معرفش بيته فين .

ماشاء الله ، أحباب الله فعلاً ، محدش يعمل بنصيحتي يا جماعة ، مشيت
لقدام لحد ما لقيت قهوة ، قعدت وطلبت شاي وسألته القهوجي ، كان عيل
مراهق طويل وحافي وسألته عن عم فرغلي ، الواد رد عليا وقالي :
- اللى قتل مراته .

فرحت أوي ساعتها وحسيت ان القهوجي ممكن يفيدني ، وفعلاً قالي على
مكان بيته ، وبدأت اسأله أسئلة زى مثلا :

- هو قتل مراته بجد ؟ طيب مراته كان عندها كام سنة ؟ طيب هو فين
دلوقتي ؟

بس القهوجي قالي وسط كلامه :

- انا جاوبت عن الأسئلة دى كلها للمخبر صاحبك اللى بييجي كل يوم هنا
بالليل .

هنا عرفت إن الشرطة لسه مهتمة بالموضوع ، ومعتبراه قتل مش اختفاء ، المهم عرفت من القهوجي إن سعاد شوقي عندها 43 سنة ، وكان أبوها راجل ثري ، معاه أطيان وفلوس ، بس كان سايب وصية أملاكه عند المحامي ، وكان شرط ان الوصية متطلعش إلا لما سعاد تخلف أو تموت ، وعرفت إن سعاد أجوزت عم فرغلي غصب عن أبوها علشان كده أبوها كتب الوصية دى كنوع من العقاب ليها ، وعرفت إن سعاد مخلقتش ، وطبعاً سجلت كل المعلومات دى في دماغى لأنى مش ناوي أسجل أى حاجة في ورق تانى ، ما أنا مش عبيط يعني زى ما انتو عارفين ، طبعاً لو كانت معلومات القهوجي صحيحة يبقى كده اللغز اتحل ، باختصار يا سادة ياسكر يا زيادة عمك فرغلي كان طمعان فى سعاد علشان كده قدر انه يوقعها فى حبه لدرجة انها اتجوزته غصب عن أبوها ، يعني فرغلي وقع سعاد فى حبه وانا فضلت 3 سنين أحب سعديّة من طرف واحد ، ما علينا يا ناس ، المهم لما عمك فرغلي اتجوز سعاد ومخلفوش وكان عارف بالوصية ، فمكنش قدامه حل غير انه يقتلها ويخفي جثتها ، وطبيعي بعد الاختفاء الناس هتنساها وهيعتبروها مفقودة أو ميتة وبكده عمك فرغلي يورث التورته كلها ، دماغه شغالة الراجل ده ، مهم أوى انكم تعرفوا ان دى مجرد تخمينات ممكن تطلع غلط ، وجايز يكون القهوجي بيكذب عليا .

مشيت من قرية شاكر وطلعت على الشغل بتاعى ، كانت الساعة 10 الصبح ، مشيت بسرعة أحسن بيحي المخبر الحقيقى واتكشفت انا والقهوجي يعملني كفتة ، لاني شفته طحن واد مكنش معاه حساب الشاي اللى شربه ، المهم نسيت أقولكم إنى شغال موظف فى وزارة الثقافة ، شغال إداري يعني أحسن تحسبوني كاتب عظيم أو فارس لا يشق له غبار فى الثقافة والأدب ، المهم لقيت فى المكتب أستاذ شماشيري ، وساعة ما شافني بص عليا بنظرات غير مريحة ، الأستاذ شماشيري كان تقريبا عنده 50 سنة وديما بيلبس نارة نظر وشعره ابيض ، المهم من ساعة ما دخلت المكتب والراجل عمال يبص ليا بصات مش مريحة ، طيب هى نقصاك يعني يا أستاذ شماشيري؟! المهم طلبت شاي من الساعي وقعدت اشتغل في الأوراق اللى المفروض أسلمها لوكيل الوزارة بعد يومين والا المدير هيخرب بيتي ، بس لما لقيت الأستاذ شماشيري ببص عليا تانى قتلته :

- فيه إيه يا أستاذ ؟
قالي بصوت عالي :

- يا لئيم .
قالها ومتكلمش تاني بس نظراته كانت بتقول انه شافني بشرب بانجو مثلا ،
المهم قالتله :
- بجد فيه إيه يا أستاذ ؟
قال بسرعة :
- أنت اللي أستاذ يا أستاذ .
لا كده الموضوع ميظمنش ، قمت منا مكاني وقعدت جمبه على مكتبه
واديته سيجارة وقتله :
- ها ... وبعدين ؟
قال وهو يولع سيجارته :
- وبعدين ... وبعدين وقعتها ازاي دي ؟
قلت وأنا مستغرب :
- هي مين ؟
قالي :
- اللي سألت عليك انهارده الصبح .
الأستاذ شماشيري وقف وبدأ يقلد مشية واحدة ست وهو بيقول بصوت
مسلوغ زي صوت ماري منيب :
- الأستاذ رأفت موجود ... طيب هيجي امتي ؟
مسكت الأستاذ شماشيري من ايده ورجعته للمكتب بتاعه لأنه على استعداد
ان يقدم او برت (صغيرة على الحب) لوحده وقتله :
- والله معرفش انت بتتكلم عن إيه .
الأستاذ شماشيري أخذ نفس عميق وبص ليا باتهام وقال :
- اه يا نمس ... يا ما تحت السواهي دواهي ... عامة هي سابت الجواب دا
معايا .
حط أيده في جيبه وقبل ما يطلع الجواب قتله :
- هي مين ؟
قال :
- سعاد شوقي يا سيدي .

حسيت إن عقلي وقف عن التفكير وحسيت بصداع ، كانت ايدي بتترعش
وأنا باخد الجواب من الأستاذ شماشيري ، سبت المكتب وطلعت وأنا سامع
شماشيري بيقول :

- ياد أعقل وتعالى كمل شغلك ...كفاية انك من ساعة إجازة العيد محدش شاف وشك .

وصلت البيت وطلعت الجواب اللي كان بيتهز بين ايديا وقرأت :

— لازم تروح عند العربية الليلة ، بطل تعمل دور الجحش اللي مش فاهم حاجة ، عامة انا حلوة معاك لحد دلوقتي ، بس لو مرحتش عند العربية الليلة دى هخلي حياتك سلسلة من الكوابيس ، وخلي بالك من الأستاذ شماشيري علشان عينه زايدة وبيعاكس البنات الحلوة .

الفصل الرابع

بعد ما قرأت رسالة سعاد شوقي جبت التليفون بتاعى وبدأت أصور الرسالة ، الرسالة مكتوبة بخط اليد ، ودا دليل قوي جدا معايا ، كده أنا معايا أصل الرسالة وصورة منها على الموبيل ، سبت الرسالة ودخلت المطبخ أعمل كوباية شاي ، كنت متوقع انى أرجع الأقي الورقة اختفت ، أو مثلا الأقي الورقة بس بدون كلام مكتوب عليها ، لكن دا محصلش ، حلو أوي كده ، شربت الشاي وولعت سيجارة ، وطلعت على قسم الشرطة .

في قسم الشرطة قابلت ضابط غير اللي قابتلته المرة اللي فاتت ، علشان كده كان لازم احكي كل حاجة من الأول ، بس لما قتلته انى جيت هنا قبل كده وحكيت الحكاية ، نادي على مجموعة من المحققين وكان منهم الضابط ومجموعة من اللي قابلتهم المرة اللي فاتت ، المهم عرفتهم انى قدرت احصل على دليل على كلامي ، الضباط كانوا مهتمين بكل كلمة بقولها ، ولما خلصت كلامي الضابط اللي قابلني المرة اللي فاتت قالي :

- هات الرسالة لو سمحت .

طلعت الرسالة من جيبي وأنا بقول :

- يافندم بعد الدليل ده المفروض نهجم على المكان بسرعة .
لاحظت انهم حاولوا يخفوا ابتسامه لأنهم حسوا انهم قاعدين قدام واحد عبيط ، بس الضابط اللي أخذ مني الرسالة مقدرش يخفي ابتسامته وهو بيبيص في الورقة ، وبعدين بص عليا ورجع الورقة ليا وقال :

- بص يا أستاذ رأفت .. احنا مقدرين شعورك وتعاونك معنا .. بس أنت كده مش بتعاوننا .. انت كده بتضيع وقتنا .

قلت بسرعة وأنا ألقى توجيهاتي عليهم :

- يا فندم انتو تجيبوا خبير خطوط بسرعة علشان الوقت مهم في الأمور اللي زى دى .

قالي بعدا ما ولع سيجارة :

- الموضوع مش محتاج خبير خطوط .. الخط ده خطك أنت .
هنا بصيت فى الرسالة وحسيت بان ضهرى تحول للوح تلج من الصدمة ، الورقة كان مكتوب فيها :

(بنطلون جديد 500 جنيه + 300 جنيه سلف من المدير + 200 جنيه للبقال + 300 جنيه تصليح التلاجة و...))

بصراحة مكنتش عارف أقول إيه ، حسيت بخجل قدام الضابط والمحققين ، خاصة انى كنت لسه برسم عليهم دور الواد اللي فاهم وبلقي عليهم تعليمات ، دا انا كنت لسه هنصحهم انهم يقسموا نفسهم 3 مجموعات ، مجموعة

تروح عند العربية ومجموعة تقتحم بيت فرغلى ، ومجموعة تجيب خبير خطوط ، بس الحمد لله انى مقلتش الاقتراح العظيم ده ، المهم افكرت حاجة مهمة ، افكرت انى صورت الرسالة بالموبيل بتاعى ، وقبل ما اطلع الموبيل فكرت فى نفسي وقلت :
- ما أكيد الصورة اللي فى الموبيل هي كمان اخذت .

المهم كنت متردد بصراحة ومش عارف أعمل إيه ، أقولهم ولا بلاش؟!
أكيد مش صعب على سعاد انها تخفى الصورة اللي فى الموبيل ، بصراحة انا مش هقول وهمشى ، كفاية كده ، زمانهم الضباط بيقولوا إيه الواد الاهل ده ، بس الضابط لما شافنى محتار قال :
- عايز تقول حاجة يا أستاذ رأفت ؟

الضابط قالها بشفقة ، عرفت ان الضابط ده اسمه صبرى وتقريبا هو أعلى رتبه هنا ، المهم طلعت الموبيل وأنا مش مصدق اللي شفته ، الرسالة موجودة على الموبيل ، على الطلاق موجودة فعلا ، وقفت من على الكرسي فى صدمة وفنجان القهوة وقع من على المكتب فنزلت أجيب الفنجان لقيت الموبيل وقع منى ، لقيت الضابط اللي وقف جنبى قرب منى ومسكنى من ايدي وفضل يطبطب على كتفى وقعدني على الكرسي وجاب الموبيل وادهوني ونادى على عسكري ينضف العك اللي أنا عملته ، اعتذرت ليهم وقدمت الموبيل لصبرى بيه ، صبرى بيه شاف الصورة على الموبيل وبص ناحية الضابط اللي كان واقف جنبى وعرفت إن اسمه بهاء ، بهاء بيه قرب منه وقال وهو مصدوم :
- دا خط ميرفت يا صبرى بيه .

قلت بسرعة :

- قصدك خط سعاد شوقي يابهاء بيه

محدث رد عليا كأنى مش موجود ، وسمعت صبرى بيه بيقولى :

- انت هتقعد معانا شوية يا أستاذ رأفت .

وكمل كلامه وهو بيبيص على بهاء بيه :

- بهاء ... خد الموبيل بتاعه واطبع الرسالة وأعمل فحص بسرعة .

انا مكنتش فاهم حاجة ، بس مرت ساعتين عبال ما رجع بهاء بيه ، وخلال الساعتين دول صبرى بيه فهمنى الموضوع وقالى :

- الخط ده زى خط واحدة اسمها ميرفت محسن ، دى طالبة جامعية

مخطوفة من حوالى 25 يوم ، أبوها راجل تاجر كبير ومعاه مصانع ، العصابة اللي خطفتها هددت أبوها بانهم هيقتلوا لو مدفعتش 3 مليون جنيه

، وهددوه ميلغش الشرطة ، بس هو لما عمل بلاغ وصله اتصال من العصابة انهم قتلوا بنته .

حسيت انى مش فاهم حاجة ، وان المواضيع بدأت تدخل فى بعضها ، أنا جاى اوريهم دليل على عفريت سعاد شوقي الأقي واحدة مقتولة اسمها ميرفت محسن ، المهم سألته :

- طيب ليه حضرتك متأكد ان ده خط ميرفت محسن ؟

قال بعد ما قدم لى سيجارة :

- احنا جنبنا كل حاجة تتعلق بيها ، دا غير ان العصابة لما كانت ترسل رسائل لأبوها كانوا بيخلوا البنت هى اللى تكتب الرسائل .

هنا دخل بهاء بيه ومعاه الموبيل بتاعى والرسالة مطبوعة كذا نسخة وقال :
- فعلا خطها يا فندم .

صبري بيه رجلى الموبيل وقالى :

- بص يا أستاذ رأفت .. انسى موضوع سعاد دى ... احنا أصلا معندناش اى دليل إن فرغى قتل سعاد ، سعاد اخنقت بمزاجها ، أو سافرت أو تنيلت المهم انها متقتلش .. وأنا واحد من الناس مش بصدق فى موضوع العفاريت ده .. بس اللى بعثك الرسالة ده لو عفريت يبقى عفريت ميرفت مش سعاد ... ومنتساش ان الرسالة مفهش توقيع سعاد يعنى علشان نبقى متأكدين أوى كده يعنى .

مشيت من قسم الشرطة وأنا دماغي بتلف ، أنا لسه مخلصتش من سعاد يا ربي الأقي ميرفت دى فى وشي !!

المهم الساعة 12 فى منتصف الليل كانت القرية كلها نائمة ، أخذت سكينة المطبخ ، وحطيت فى جيبي مصحف صغير ، ولبست (كوتشى) علشان أقدر أجرى لو حصلت حاجة ، وأخذت كشاف وتأكدت إن الشارع فاضى ، وركبت الموتوسكيل وطلعت على الغيط اللى شفت فيه العربية ، ولعت النور العالي ومشيت وسط الغيطان والزروع وأنا مرعوب ، الضلمة والسواد فى كل مكان ، فيه نسيم خفيف بيحرك الزروع وبيخلها تعمل صوت مخيف ، كنت كل شوية ابص ورايا وأنا راكب الموتوسكيل ، بس ورايا ضلمة ونور الموتوسكيل يدوبك منور قدامى لمسافة 5 متر ، وقفت بالموتوسكيل وولعت الكشاف اللى معايا وعلقته فى رقبتى ووجهته للخلف ومشيت ، كده فيه نور قدامى ونور ورايا ، يارب يجعل حياتنا نور فى الدنيا والآخرة يا رب ، كنت حاسس ان شكلى مخيف وأنا ماشى بين

الغيطان والنور طالع من قدامى ومن ورايا ، كده لو شافني حد هيفتكرني
 عفريت ، ما علينا ،
 المهم وصلت للمكان الرهيب ، ركنت الموتوسيكل وسبته شغال والمفتاح
 فيه علشان أعرف أهرب بسرعة لو حصلت حاجة ، مسكت الكشاف اللي
 كنت معلقة فى رقبتى ومشيت ، الايد اليمين فيها الكشاف والايد الشمال فيها
 سكينه المطبخ ، كانت فيه شجرة قريبة ، قربت منها وفضلت أوجه الكشاف
 بتاعى في كل مكان ، أنا كده واقف في المكان اللي شفت فيه العربية ،
 أنا جيت اهو عند العربية ياسعاد ،
 فينك بقا ؟

وفجأة حسيت بأيد تحطت كتفي ، طرت مترين فى الهوا من الخضة
 والمفاجأة واستدرت بجمسي لورا وانا رافع ايدى بالسكينة بس لقيت ايدى
 فاضية ، اكتشفت ان السكينة وقعت مني والكشاف كمان وقع ، ولقيت نفسى
 وجهها لوجه قدام شبح مخيف ، كان طويل ولسه ايدى على كتفي ، حاولت
 اعرف ملامح وشه بس الدنيا ضلمة ، انا شايفه كأنه شبح كل حاجة فيه
 لونها اسود ، وايدى اللي كتفي كأنها ايد عملاق أو ديناصور ، كانت كل حثة
 في جسمي بترقص من الخوف ، مكنتش عارف أتكلم ولا أصرخ ولا أعمل
 ايه ، وهنا سمعت الشىء ده بيقولي :
 - ايه اللي جابك هنا يا رأفت ؟

الفصل الخامس

كانت ايدى لسه على كتفي لما قالى :

- إيه اللي جابك هنا يا رأفت ؟

أنا مردتش من الخوف ، لا رديت ، أيوه كنت برد وبتكلم بس شفافي كانت تتحرك بس مكنش فيه كلام طالع مني ، أنا اتشليت ولا إيه؟! الكائن العجيب نزل ايده من على كتفي ومسك الكشاف اللي كان مرمي على الأرض ، وساعتها شفت وشه ، كان بهاء بيه ، الضابط بهاء بيه ، بس الموقف والمفاجأة خلوني افكر إنه شبح سعاد شوقي ، المهم بهاء بيه فضل ربع ساعة يهدي فيا لحد ما قدرت انطق وأقوله :

- أنت جاي هنا إيه ؟

رد عليا وهو بيديني سيجارة :

- خد الأول السيجارة دي علشان أعصابك تهدي ... أنا ياسيدي مؤمن بكل حكايتك ... وقررت اني أجي للمكان اللي وصفته لينا ... بس مكنتش عارف انك هتيجي في نفس الليلة ونفس الساعة ... أنا جيت بعدك بدقايق ... وفي الأول افكرتك فرغلي ... بس لما شفت وشك وأنت بتحرك الكشاف ناحية الشجرة عرفتك .. قلت أجي أشوفك بتعمل إيه .

قلت :

- قصدك تيجي تنشف الدم في جسمي .

ضحك وهو بيقول :

- أجمد كده يا أستاذ رأفت .

قلته :

- طيب إيه حضرتك مصدق حكايتي رغم انك زمايلك الضباط مش مصدقين؟

قال وهو بيبيص في ساعة ايده :

- لان فرغلي جوز سعاد شغال سواق ... وفيه احتمال ضعيف إن الراجل اللي شفته بالعربية يكون هو ... هو احتمال ضعيف بس شغل التحقيقات خلاني أمشي ورا أي خيط حتى لو كان ضعيف .

قلت في خوف شديد :

- أنا اصلا جيت هنا علشان الست اللي بتبعثلي رسايل هددتني إنني لازم أجي هنا الليلة .

قال في سخرية :

- جميل جدا يا أستاذ رأفت .

قلته في غباء :

- طيب المفروض هنعمل إيه دلوقتي ؟

قال بعد ما رمي عقب سيجارته :

- هنمسخ المنطقة دي ونشوف .
 وفضلنا ندور ناحية الشجرة وفي المكان اللي كانت فيه العربية ، كان هو
 ماسك الكشاف وأنا ماسك سكينه المطبخ وماشى وراه ، بس قالي :
 - إيه رأيك أنا أدور هنا وأنت تدور في غيط الدرة اللي هناك ؟
 قتلته بسرعة :
- ميصحش أسيبك يا بهاء بيه .. لازم أبقى في ضهرك .
 أنا قتلته كده لاني خايف أبعد عنه ، أنا ما صدقت إنني ألاقي حد يونسني
 ويزيل الخوف مني ، بس هو فهم إنني خايف وقالي :
 - جميل ... جميل جدا يا أستاذ رأفت .
 بعد نص ساعة من البحث في كل الحقول القريبة من الشجرة ملقناش ولا
 حاجة ، علشان كده بهاء بيه قالي اننا هنروح ، وقالي :
 - العربية بتاعتي قريبة من هنا .
 بس واحنا ماشيين ناحية الموتوسيكل لاحظنا آثار أقدام ، الآثار دي كانت
 حديثة ، يعني لسه ظاهرة في الأرض ، ودا معناه إن صاحب الأقدام دي
 مشى هنا من فترة قريبة ممكن تكون أسبوع ، لما شفنا آثار الأقدام بصينا
 لبعض في وقت واحد ، وسمعت بهاء بيه بيقولي :
 - هندور من جديد .
 رجعنا ناحية الشجرة ، سمعت بهاء بيه بيقولي :
 - امسك الكشاف وخلي الضوء ناحية الغيط ده .
 قتلته :
- بس احنا دورنا هنا يا باشا من شوية .
 قالي وهو بيديني الكشاف :
 - بس أنا لاحظت حاجة بتلمع وسط الدرة .
 مسكت الكشاف ومشت جنبه وهو بيقرّب ناحية حاجة بتلمع ولم بهاء بيه مد
 ايديه لقي ساعة يد رقمية ، وقبل ما يمسكها قالي :
 - معاك منديل .
 أديته منديل ومسك بيه الساعة وفضل يبص فيها فترة طويلة ، وقالي :
 - الساعة شغالة .
 أنا طبعا مش عارف الملاحظة دي هتفيد في إيه بس قلت وأنا بحاول أقلده :
 - شغالة ... ياه .. جميل ... جميل جدا يا بهاء بيه .
 ابتسم بهاء بيه ولف الساعة في المنديل وحطها في جيبه وقالي :
 - طيب هنمشي وسط عيدان الدرة في القناة دي لان أكيد صاحب آثار الأقدام
 مشى الناحية دي .

فضلنا ماشيين لحد ما أنا زهقت وتعبت وحسيت إننا بنضيع وقتنا خاصة
انني بدأت أشم ريحة وحشة تشبه ريحة السباخ المتخزنة ، قلت لبهاء بيه :
- بهاء بيه أنا مش طايق الريحة دى .. يلا بينا نمشى من هنا .. أنا اتخفت .
قال من غير ما يبص عليا :

- ريحة سباخ دى صح ؟

قلته :

- تشبه ريحة السباخ مش سباخ .

قال :

- جميل جدا انها مش سباخ ... جميل يا أستاذ رأفت .

قلته في غباء :

- بتتريق عليا يا بهاء بيه ؟

قالى :

- دي ريحة جثة يا أستاذ رأفت .

شعر راسي وقف لَمَّا سمعت الكلمة ، وأخذت بالي إن الريحة نتنة لدرجة لا
تُطاق ، وبهاء بيه غير من اتجاهه ناحية اليمين وقالى :

- تعالى ورايا ... الريحة هنا بتزيد .

طبعا عرفت انه هيمشى ناحية مصدر الريحة ، لأنه قال :

- طالما الريحة بتزيد يبقى احنا ماشيين صح .

أنا حظيت ايدي على أنفي من نتانة الريحة ، وفضلنا ماشيين لحد ما شفنا
كومة تراب ، بهاء بيه وقف وبص ناحيتى وقالى :

- ياريتنا كنا جنبنا فاس معانا .

قلته :

- احنا عبال ما نروح نجيب فاس تكون البلد كلها عرفت يابيه .

قال :

- خلاص نحفر بأيدينا .

مرّت ساعة تقريبا واحنا نزيل التراب بأيدينا ، حاولت أخلي بهاء بيه

يستريح وأنا أحفر مكانه بس هو رفض وقال :

- أنت فاكرنى إيه ؟ ! أنا أصلا أبويا فلاح ابن فلاح .

كنت هقوله جميل جدا بس الموقف كان صعب اننا نهزر ، كنت متأكد إننا
مش هنلاقي حاجة ، وبهاء بيه ميعرفش حاجة عن الفلاحة ، ولو أبوه فلاح
كان عرف ان دى مجرد كومة تراب بنعملها احنا في الصعيد اسمها القطع
، مش عارف اشرحها ازاي ليكم بس باختصار شديد الأرض الزراعية
بتحتاج تجدد نفسها بسبب تكرار زراعة نفس المحصول عليها علشان كده

بناخذ الطبقة العلوية من الأرض ونجمعها في كومة ترابية ونحط مكانها سباخ ، المهم وأنا بفكر شفت بهاء بيه ببسد أنفه بأيد وبيحفر بالأيدي الثانية ، بس بهاء بيه طلب مني أثبت الكشاف على الأرض وأخلى الضوء كله ناحية الجزء اللي بنحفر فيه ، وخطيت الكشاف على الأرض زى ما قال وفضلنا نحفر لمدة نص ساعة ، وفجأة سمعت صوت خشخشة في عيدان الدرة من بعيد كأن حد رمي حجر ضخم على وسط عيدان الدرة ، بصيت ناحية الصوت بس كانت الدنيا ضلمة ، قلت وأنا مرعوب :

- بهاء بيه ... سمعت الصوت اللي أنا سمعته .

قال :

- لا مسمعتش .. امتى حصل الصوت ده ؟

قلت :

- الصوت اللي جاى من الدرة اللي هناك .

قال :

- احفر يا أستاذ رأفت وسبيك من الهلوسة .

رجعت أحفر وحسيت تليفوني بيتهز في جيبى ، عملت نفسي بتأكد من ثبات الكشاف وطلعت التليفون من ايدى ولقيت رسالة مبعوتة ، طيب دا وقته؟! كنت هرَجَع التليفون لجيبى بس لسبب مجهول قلت أفتح الرسالة خاصة إنها كانت مبعوته من رقم غريب وكانت الرسالة بتقول :

- الصوت اللي سمعته صوت حقيقي ... أنا سديت ودان بهاء بيه قبل ما أعمل الصوت علشان محدش يسمعني غيركسبيك من كومة التراب دى .. وامشى ناحية الصوت هتلاقي كومة تراب تانية ... احفر فيها ... ولو قلت لبهاء بيه على الرسالة دى هخرب بيتك .

الفصل السادس

بعد ما قرأت الرسالة طفيت التليفون وحطيته فى جيبى وقلت لبهاء بيه :
- ما تيجى ندور فى الناحية دى يا بهاء بيه .

الراجل كان منهمك أوي فى الحفر وقالى من غير ما يبص عليا :
- مش جميل خالص الاقتراح ده يا أستاذ رأفت .

قلته وأنا مبرق عنيا وباصص بعيد علشان أوحى له بالخطورة :
- بس أنا حاسس إن الريحه جاية من هناك يا باشا .

بهاء بيه توقف عن الحفر وبدأ يهتم بكلامى وبص ليا من غير ما يتكلم ،
فقلت له :

- الكومة اللى بنحفر فيها دى مجرد سباخ متخزنة مش أكثر لكن الريحه
النتنة جاية من هناك .

قال وهو بيقف :

- جميل .. جميل جدا يا أستاذ رأفت .

أخيرا الراجل اقتنع بكلامى ، كنت خايف إن كلامى ميطلعش صح ، وإن
الرسالة اللى وصلتنى دى تكون وهم أو مقلب من سعاد ، بس عامة وصلنا

للمكان اللى سمعت فيه صوت خشخشة عيدان الدرة ، وفعلا لقينا كومة
تراب ، حفرنا يدوبك عشر دقائق بس ، وفجأة ظهرت جليبية واحنا بنزير

التراب ، حسيت إن قلبى وقع بين رجلىا ، الموضوع طلع بجد ولا إيه؟!
بهاء بيه طلب من أثبت الكشاف على الأرض ، وطلب أساعده فى شد

الجليبية ، وظهرت لينا يد إنسان ، كانت متحللة متعفنة والريحه لا تُطاق
كأننا فى قبر ، وشفيت بهاء بيه مسك ايد الجثة وطلب منى أقرب الكشاف

ناحيته ، قرّبت منه الكشاف وأنا ببص الناحية الثانية من الخوف
والاشمئزاز ، وبعدها سمعت بهاء بيه بيقول :

- يلا بينا .

قلت باستغراب :

- والجثة؟!!

قالى :

- خلاص ... أنا من خلال الأظافر تأكدت إنها جثة أنثى ، دلوقتي هنبعد
علشان ناخذ نَفْسْنَا بعيد عن الريحه دى عبال ما اتصل بصبري بيه .

رجعنا للعربية بتاعت بهاء بيه ، وبعد نص ساعة كانت 3 عربيات شرطة
وعربية إسعاف فى المكان ، وأخدوا الجثة ومشيووا ، وأنا كنت ماشى وراهم
بالموتسيكل بتاعى لحد أول القرية ، هم طلّعوا على الطريق السريع على
مستشفى طهطا وأنا رجعت للبيت ، طبعا منمتش طول لحد الصبح وأنا كل

ما أغمض عنيا أشوف قدامي صورة ايد الجثة رغم إني كنت بحاول أبص بعيد عنها ساعة ما مسكها بهاء بيه ، والساعة 7 الصبح كنت هقع من طولي بسبب الإرهاق وقلة النوم ، بس لو نمت دلوقتي مش هصحي إلا لو حطوا في وداني ديناميت ، أنا عارف نفسي كويس ، أنا من النوع اللي لما أنام مش بصحي الا بالطبل البلدى يدق جنب راسي ، طيب دلوقتي الساعة 7 ، وأنا المفروض أكون في الشغل الساعة 9 الصبح وإلا المدير هيخرب بيتي ، أنا بكره الوظيفة الحكومية بحسها سجن بيسرق الاعمار ، دا غير السمعة اللي هيطلعها عليا الأستاذ شماشيري لو مرحتش الشغل انهارده ، عملت قهوة وولعت سيجارة وعلى الساعة 7 ونص اتصل بيا بهاء بيه وقالى :

- خمس طعنات في الصدر وطعنيتين في الرقبة من الجنب الأيمن ، ومن حسن الحظ لقينا شعر في الساعة ، وبعد تحليل (dna) عرفنا إن الشعر ده بتاع فرغلي ... بس عارف يا أستاذ رأفت ... ولا أقولك تعالالى المكتب علشان فيه حاجة مهمة ومش عاوز حد يعرفها غيرك .
 قفلت السكة وأنا بترحم على المسكينة سعاد شوقي ، روحها كانت حيرانة وكانت مصرّة تعرفني مكان قتلها .

في الشغل قابلت المدير وسمعت منه كلمتين وفضل يديني درس في آداب الالتزام بمواعيد العمل ، والأستاذ شماشيري كان كل شوية يبص عليا ويقولى قدام المدير :
 - الزواج يا أستاذ ... الزواج هو الحل .. هيزيلك تتحمل المسؤولية وتبطل السهر والتفكير .
 وعلشان أخلص منه ومن تلميحاته قتلته :
 - طبعا طبعا .. الزواج دا مهم أوي على فكرة ... شكرا على نصيحتك .

الساعة 3 العصر كنت في مكتب بهاء بيه ، وبعد ما أمر بفنجان قهوة وقدم لي سيجارة قالى :
 - بص يا أستاذ رأفت ... احنا أمرنا بدفن الجثة وقبضنا على فرغلي بس مش عايز يعترف .
 قلت في ذكاء :
 - طبعا مش هيعترف ... مفيش مجرم بيعترف من أول مرة .
 قال وهو بيتسم :
 - بس أنا حاسس انه بريء ؟

قلت باستغراب وغيظ :

- نعم ؟!!!!

قالي :

- ما هو مش معقول يكون مغفل لدرجة انه يسبب الساعة بتاعته جنب الجثة ... وكمان عليها شعر . دا غير اننا واحنا بنحقق معاه قال جملة غريبة .

قلت :

- جملة ايه ؟

بهاء بيه حط فنجان القهوة الفاضى على المكتب وقال :

- قال احنا كنا بنهزر يابيه ... كنا بنهزر والموضوع قلب بجد .

قلت وأنا متغاض :

- يا بهاء بيه مش تحليل dna أثبت إن الشعر اللي على الساعة بتاع فرغلي

قال :

- اه .. وكمان هو اعترف إنها ساعته .

قلت :

- يبقى فرغلي هو القاتل والقضية خلصت يا بهاء بيه .

بهاء بيه اتكا لورا أكثر وبص لدخان سيجارته في شرود وقال :

- جميل .. جميل جدا يا أستاذ رأفت .

في نفس اليوم بالليل كنت حاسس بكمية راحة كبيرة أوى ومبسوط إني ساعدتهم فى حل اللغز ، ياه ! حمل وانزاح ، أخيرا مفيش عفاريت ولا أشباح تتصل بيا تاني ، أيوه كده يا رأفت ارجع لحياتك الطبيعية ، أخذت دش بارد و عملت لنفسى كوباية شاي وفضلت أقلب في النت وفجأة تليفوني رن ، كان رقم غريب ، فتحت السكة وقلت :

- الوووو

سمعت واحدة بتقول :

- شكرا يا أستاذ رأفت .

قلت :

- مين معايا ؟

ضحكت ضحكة طويلة لا تخلو من دلال وقالت :

- سعاد شوقي .

رميت كوباية الشاي اللي في ايدى والسيجارة لسعت صباعى وفضلت دقيقة

لمد ما أعصابي هديت شوية وقلت :

- الله يخربيتك .. انتى المفروض ادفتنى .
قالت :

- لا أنا تحررت .
خرجت من الصلاة وفضلت ادخل كل اوضة افتح النور بتاعها وقلت :
- تحررتى ازاي ؟!!!
قالت :

- أنا كنت محبوسة في الجثة بقالي 29 يوم ، ولو فات عليا شهر وانا
محبوسة في الجثة كنت هموت ، وكان لازم أتححرر ، علشان كده امبارح
طلبت منك تروح الغيط بالليل .
قلت :

- استنى استنى الله يخربيتك ... 29 يوم ازاي ؟ انتى المفروض عفريته
سعاد شوقي ... وسعاد مقتولة يدوبك من أسبوعين .
ضحكت ضحكة رنانة وقالت :

- ومين قالك إن الجثة اللي لقيتوها تبقي جثة سعاد شوقي .
قلت وأنا مرعوب والتليفون بيتهز في ايدي :

- او مال جثة مين ؟ وانتى مين ؟
قالت :

- عارفة إن فيه أسئلة كثير في دماغك بس بلاش طمع مش هينفع أقولك
حاجة في التليفون ، أنا بس حبيت أشكرك وأعرّفك انك لو تأخرت يوم واحد
عن دفن الجثة اللي كنت محبوسة فيها كنت هموت .
قلت :

- يعنى انتى حية ولا ميتة دلوقتي ؟
قالت :

- طبعا حية ... أنا بسكن الأجسام ... بس لما سكنت جسم ميرفت مكنتش
عارفة إن العصابة هتقتلها واتحبس أنا في جثتها .
قلت بسرعة :

- يعنى انتى مش سعاد شوقي ؟
قالت :

- ماشاء الله عليكى ذكي جدا يا أستاذ رأفت .
طبعا كلامها فيه تريقة ، الكل بيتريق عليا حتى العفاريت ، المهم قلت :
- او مال جثة سعاد شوقي فين ؟
قالت :

- سعاد لسه عايشة يا أستاذ .. وعلى فكرة لو فكرت بس تعرف بهاء بيه هخليك تلف حوالين نفسك .

قلت :

- ولا تقدرى تعملي حاجة .

قالت :

- طيب لحظة كده .

فجأة لقيت النور قطع والبيت كله بقى ضلمة سواد ، اترعبت وشعر راسي وقف وجسمي كله بدأ يترعش ، ولعت كشاف التليفون وبدأت أشوف ، حظيت التليفون على ودني وسمعتها بتقول :

- روح كده بص في المطبخ .

مشيت ناحية المطبخ وأنا بجر في رجليا جر من الفرع ، وشفنت نار طالعة من حوض المطبخ ، الغريب إن النار طالعة من جوه الحوض وواصلة لحد السقف من غير ما تحرق حاجة ، حظيت التليفون على ودني وقلت :

- ارجوكي خلاص ... مش هقول لبهاء بيه ولا هجيب سيرة لحد .

لقيت النور رجع والنار اللي في حوض المطبخ اختفت وسمعتها بتقول :

- اتفقنا يا جميل .

قلت :

- طيب انتى عفريته مين ؟

قالت :

- أنا مش عفريته .

قلت :

- كل اللي بتعمله ده ومش عفريته ! أو مال لو عفريته كنتي عملتي فيا ايه !؟

سمعتها وهى بتضحك ضحكة مخيفة وقالت :

- أنا مخلوقة زيك يا أستاذ رأفت ، بس أنا جاية من عالم تاني غير عالمكم وغير عالم العفاريت والأشباح .

قلت :

- مش من عالمنا ولا عالم العفاريت ... كده مش فاضل إلا عالم الحيوان .

قالت :

- تمام ... هعتبرها نكتة ومش هزعل ، لانى لو زعلت مش هتقدر تستحمل زعلي ... عامة انا جاية من عالم اسمه أشلول ... ودلوقتي سلام وقتك

انتهى .

قلت بسرعة :

- طيب عاوز افهم حكاية الـ...

قاطعتني وقالت :

- بعدين ..لما نتقابل .

قلت باستغراب :

- نتقابل ؟!!!

قالت :

- طبعا لازم نتقابل ..وقريب أوي ... لازم أشكرك وجهها لوجه ...عايزاك

تتوقع ظهوري ليك في أي وقت ...اصبر بس عليا .

وقبل ما أتكلم لقيتها قفلت السكة .

الفصل السابع

بعد ما قالتلى اننا هنتقابل وجهها لوجه قفلت السكة ، وفضلت أفكر في كلامها

، ازاي يعني هي من عالم أشلول !؟

ويطلع إيه العالم ده ؟

طيب هي ممكن بتقول كده علشان تخوفني؟! فتحت تليفوني ودخلت على النت وبدأت أبحث عن كلمة أشلول ، وكانت نتائج البحث مخيبة للأمال :

- الشلولو (طبخة صعيدية) .

- الشلول (هو الخفيف السريع من اناث الابل) .

المهم ملقتش حاجة اسمها أشلول ، وسرحت شوية وبدأت أركز وأجمع أفكارى ،

- اللى بتكلمني مش سعاد شوقى ،

- وسعاد شوقى لسه عايشة ،

- ولو قلت لبهاء بيه إن سعاد لسه عايشة بيتي هيتخرب ،

- والجثة اللى لقيناها جثة ميرفت محسن ،

- والعصابة قتلت ميرفت محسن لأن أبوها بلغ الشرطة ومدفعتش الفدية ،

- وفتاة أشلول كانت ساكنة جسم ميرفت محسن ،

- وفتاة أشلول معرفش اسمها بس هي من أشلول ،

ياسلام !!!

معلومات ثمينة أوي زى ما انتو شايفين ، الأخطر من كده إنها ناوية تقابلني ، والمفروض إنى أتوقع ظهورها في أي وقت .

تانى يوم لما صحيت لقيت لسه 5 الفجر ، حاولت أنام تانى بس مفيش فايده

، صحيت وفطرت وغيرت هدومي وقررت انزل أضيع الوقت عبال ما

بيجى ميعاد الشغل ، مشيت شوية في شوارع القرية ، والساعة 7 كانت قدام

بيت الثقافة اللى شغال فيه ، مكنش حد من الموظفين لسه جه غير عم

شعبان العامل ، لقيته واقف مستنى ، مكنتش عايز اكلمه علشان عارفه

هيقولي ايه ، بس لما شافني اضطريت اقوله :

- صباح الخير ياعم شعبان

قال بابتسامه واستغراب :

- صباح الفل .. صباح النعناع ... صباح الحلويات ... ماشاء الله ، إيه

النشاط ده يا أستاذ رأفت؟! .. أول مرة أشوفك جاي بدري كده .

قلتله :

- أرجع طيب ياعم شعبان .

ضحك وهو بيبيص في ساعته وقال :

- لا ترجع إيه ... خلاص الأستاذ شماشيرى على وصول ... بس قولي ...
مش ناوى تتجوز ... هها هها .
(اه ابتدينا بقا) .. قلتها فى نفسي ، مفيش مرة شافني فيها عم شعبان إلا
وسألني السؤال ده ومعاه ضحكة (هها هها) ، حطيت ايدى في جيب
وظلعت علبة السجاير وأديته سيجارة من غير ما أتكلم ، أخذ السيجارة وقال
:

- يدوم العز يا أستاذ .
ساعتها وصل الأستاذ شماشيرى ولما شافني قال :
- ايه ده ... الاستاذ رأفت جاى قبل ميعاده ... هيموت واحد انهارده ... بس
المدير هيتبسط منك أوي .
المهم بدأنا الشغل وخلصت كل الأوراق المطلوبة مني ، وجه المدير الساعة
8 ولما شافني قالي بقرف :
- تعالالى على المكتب .
ولما رحلته المكتب قالي :
- ماشاء الله يا استاذ جاى متأخر زى كل يوم .. انت مش هتبطل العادة دى
أبدا .
قلته :

- يا بيه الساعة 8 دلوقتي .
بص فى ساعته وقالي :
- تصدق عندك حق ... اعذرني .
وبعدين غير من نبرته وقال :
- اسمع بقا ... فيه موظفة منقولة من القاهرة وجاية هنا ... هتوصل الساعة
9 ... تستلم (الدوسيه) الخاص بيها ... وتعملها مباشرة عمل .. وتدرج
اسمها في دفتر الحضور والانصراف .. عبال ما بيعتو ملف الماهيات
بتاعها بالبريد .

رجعت للمكتب وانهمكت في الشغل ، بس الأستاذ شماشيرى كان عمال
يقول نكت شوية ويهزر شوية ويدندن شوية ويشتكى من ضهره وألم
المفاصل شوية ، كان بيحاول يفتح معايا كلام بس أنا مش فايق لهزاره
وكلامه ، علشان كده لما كان يكلمني كنت أقول :
- يااه ... اه ... كويس ... امممممم .. طبعاً .

الساعة 9 ونص شميت ريحة برفان ، بصيت بطرف عيني ناحية الأستاذ
شماشيري لقيته عمال يشمشم وسألني :

- انت حاطط برفان .

مردتش عليه ورجعت للأوراق تاني ، بس فجأة دخلت علينا صاحبة
البرفان ، كانت تقريبا في العشرينات من عمرها ، وقفت قدامي وقالت :

- مكتب المدير فين ؟

وقبل ما أرد لقيت الأستاذ شماشيري وقف من مكانه ، وجه ناحيتها وهو
بيغمز بعينه ليا وقالها :

- تفضلي استريحي الأول عبال ما أبلغ المدير ... بس أقوله مين ؟

ردت البننت بطريقة درامية مليانة دلالة وقالت :

- سوزي .

سوزي ؟!!!! دى أكيد من البندر ، الاسم ده لسه موصلش عندنا هنا ، المهم
الأستاذ شماشيري لمّا سمع اسمها جري ناحية مكتب المدير بكل همة
ونشاط رغم إنه طول اليوم يشكي لي من ضهره والمفاصل ، جري ناحية
مكتب المدير لدرجة إنه دخل من غير ما يخبط على الباب ، دفنت راسي
وسط الأوراق ، وبعد شوية سمعت البننت بتقول :

- ممكن أقعد ؟

بصيت ليها وقلت :

- تفضلي .

رجعت للأوراق بس كنت بسرق نظرات ليها كل شوية ، كان شعرها أسود
ووشها مدور وماسكة شنطة صغيرة فى ايدها ، ولمّا الأستاذ شماشيري
تأخر عند المدير فهمت إن المدير بيهزقه ، فابتسمت فى نفسي ، وبصيت
تاني للبننت لقيتها حطت رجل على رجل وطلّعت من شنطتها مرايه صغيرة
وفضلت تبص فيها وهى بتعدل فى شعرها ، كانت جميلة ورشيقة ونظراتها
حادة فيها ذكاء ، عامة هي أكيد شاعرة أو كاتبة جاية تقيم ندوة أدبية ، بعد
شوية رجع الأستاذ شماشيري وقال :

- معلش يا آنسة المدير مشغول دلوقتي ... بس الأستاذ رأفت هيقوم

بالواجب .

بصيت للأستاذ شماشيري وأنا مش فاهم حاجة ، بس لقيته قرب منّي وقالى
فى ودني :

- الموظفة الجديدة اللي منقولة من القاهرة .

اتصدمت لما قالي كده ، ازاي البسكوتة دي هتشتغل هنا ؟
أولا هي مش هتستحمل الشغل هنا ، ثانيا الأستاذ شماشيري هيبات في
الشغل كل يوم بسببها ، المهم طلبت منها الملف الوظيفي وعملت ليها
مباشرة عمل وأنا بقرأ في اسمها :

- سوزي سامح شاهين ،

يا سلام ، اسم فعلا يدل على العز ، بس دي إيه اللي جابها من القاهرة ؟!
البنيت صغيرة ومش مجوزة ، لان معظم نقل الموظفين خارج الأقاليم
بيكون بسبب لم الشمل ، يعني المفروض هي اجوزت واحد عايش هنا
علشان كده طلبت النقل علشان تعيش معاه وده إداريا اسمه لم شمل الأسرة
، المهم لاحظت إن الأستاذ شماشيري عمال ينتنط كل شوية ويقول :

- نورتي بيت الثقافة يا أنسة .

وهي كانت ترد بطريقة ناعمة :

- ميرسي أوي .

المهم أنا خلصت الأوراق مكنش باقي غير توقيع المدير ، دخلت أوضة
المدير علشان يوقع عليها ، المدير قالي وهو بيوقع على الأوراق :
- خليها تروح ، وخلي عم شعبان يجهز ليها مكتب في حجرة المكتبة .
خرجت من مكتب المدير وقعدت على مكتي وحطيت مباشرة العمل في
الملف بتاعها وثلته في الدرج وقلت لها :

- تقدرى تروح عبال ما تجهزلك مكتب بكرة .

وسمعت الأستاذ شماشيري بيقول :

- تروح إيه يا أستاذ ؟ عليا الطلاق ما تروحي إلا لما تشربي حاجة يا أنسة .

الله يخربيتك يا أستاذ شماشيري ، أنا عارف إنها مش هتستحمل هنا يوم
واحد ، المهم الأستاذ شماشيري خرج وهو بينادي على عم شعبان ، كنت
بحاول أتحاشى النظر ليها مش عارف ليه ، وفضلنا ساكتين لحد ما رجع
الأستاذ شماشيري وهو جايب القهوة بنفسه ، وحط فنجان القهوة على مكتي
قدامها وقال :

- أحلي فنجان قهوة لأحلي أنسة سوزي .

البنيت مالت ناحيتي وقالتلى بصوت واطي :

- مش قلتلك تخلي بالك من الأستاذ شماشيري علشان يبحب يعاكس البنات
الحلوة .

مكننش فاهم تقصد إيه، بس الجملة دي سمعتها فين قبل كده ؟!

سمعتها فين؟!!

يا نهار أبيض ، افتكرت ،

وقفت زى الملسوع وأنا مش مصدق اللي سمعته ، كنت حاسس إن الزمن

توقف بيا والدنيا بتلف ، وسمعت الأستاذ شماشيري بيقول :

- مالك يا أستاذ رأفت تخضيت كده زى المجنون .

ولما انتبهت لقيت نفسي واقف ومبرق في البنت والعرق نازل على عنيا ،

حاولت اهدي نفسي وقعدت ، وسمعت الأستاذ شماشيري بيقول :

- معلش يا أنسة سوزي ، أصل الأستاذ رأفت مبيعرفش يتعامل مع الجنس

اللطيف .

قلت في نفسي :

- اه يا شماشيري لو تعرف إن اللي قاعدة معانا دي من جنس العفاريت مش

جنس لطيف ولا حاجة .

كانت لسه الصدمة مأثرة عليا ، بس ازاي مأخذتش بالي إن صوتها هو نفس

الصوت اللي كان بيكلمني في التليفون كل مرة ، البنت جميلة وعسولة

ومش باين عليها أبدا إنها عفريته ، كنت مبرق ناحيتها وهي كانت بتبسم ،

الأستاذ شماشيري ساب مكتبه وقرب مني وقال في ودني :

- عنيك هتاكل البنت ، عمال تطلق فيها زى المجنون ، البنت تقول علينا إيه

!؟

المهم سوزي وقفت وقالت :

- ميرسي على القهوة يا أستاذ شماشيري وبصت ناحيتي بنظرة فيها دلالة

ومشيت ، والأستاذ شماشيري مشى وراها عامل نفسه بيوصلها وسمعته

بيقول :

- ما بدري يا أنسة .

بعد شوية رجع الأستاذ شماشيري وبدأ يكلمني ومكنتش عارف هو بيقول

إيه ؛ لأنني كنت سرحان بفكر في اللي حصل ، لحد ما الأستاذ شماشيري

هز كتفي علشان يفوقني من شرودي وقال :

- فوق يا أستاذ مالك ؟ البنت أخذت عقلك من أول نظرة ولا إيه؟ ... بس

شفت كانت بتبسم ازاي وأنا بكلمها ، يا سلام يا أستاذ رأفت على جمالها

ورقتها وهي بتقول ميرسي على القهوة يا أستاذ شماشيري ، طيب تصدق

أول مرة اعرف ان اسمي حلو كده .

رَوّحت البيت وأنا مش قادر انسي اللي حصل ، وفضلت لحد الساعة 2 بالليل متسنى اتصال منها ، بس متصلتش ، كنت مستنيها تتصل وتفسرلي اللي حصل ، تانى يوم رحت الشغل الساعة 8 ونص ، الأستاذ شمشيري قالى :

- المدير مستنيك .

دخلت للمدير اللي بص عليا وقالي :

- جهزتوا مكتب مدام سوزي ؟

مدام !!!؟

بس افكرت إن المدير امبارح مشفهاش وميعرفش إنها أنسة ، قلت :

- اه ... عم شعبان جهزه امبارح بعد ما حضرتك مشيت .

قال :

- تمام ... خليها تاخذ نص يوم عمل بس لمدة أسبوع علشان دى ضيفة عندنا لحد ما تاخذ على الجو هنا .

خرجت من اوضة المدير وكان الأستاذ شمشيري ساكت مش بيتكلم ، وبعد

نص ساعة دخلت علينا واحدة ست عمرها تقريبا 55 سنة ، ست بدينة

ولابسة نضارة قعر كوباية ، وقالت :

- صباح الخير .

بعد ما ردينا أنا والأستاذ شمشيري شفت الست دى دخلت حجرة المكتبة ،

استغربت أوى وقلت للأستاذ شمشيري :

- مين دى يا أستاذ شمشيري !!! وازاى دخلت على حجرة المكتبة على

طول كده من غير ما تسألنا هى مين وعايزة ايه .

قال :

- سلامتك يا أستاذ رأفت .. ما هو دى مدام سوزي الموظفة اللي منقولة من

القاهرة ..دا أنت جهزت لها الأوراق امبارح بنفسك ... نسيت ولا إيه ؟

الفصل الثامن

لما الأستاذ شمشيري قالى إن الست البدينة دى تبقى هي سوزي ابتسمت
لأني كنت متوقع إنه بيهزر ، قتلته :

- بجد مين الست دى يا أستاذ شمشيري ؟
قال بجدية :

- سلامة ودانك يا أستاذ ... قتلتك دى مدام سوزي .
قلت :

- او مال مين اللي كانت امبارح وكانت حاطة برفان ؟
قال :

- برفان ... وحياتك ما شميته من سنين ... هو حد يشتغل هنا ويحط برفان
..الى يترمي هنا يحط قطران يا أستاذ .

وقفت وقربت من الأستاذ شمشيري وأنا مش مستوعب ، ولسه معتقد إنه
بيهزر أو بيعمل فيا مقلب ، قلت :

- أستاذ شمشيري ... بالله عليك تقول الحق ... دى سوزي بجد .
قال :

- عليا الطلاق دى مدام سوزي .
قلت :

- لا ..أنا قصدي على الأنسة سوزي ... اللي جات امبارح ...الى حاطة
برفان يا أستاذ شمشيري ... افكر كويس .

قال وهو بيولع سيجارة :

- أنت بتتكلم عن مين بالضبط ؟
قلت :

- بتكلم عن اللي جات امبارح وأنا عملتها مباشرة عمل ، وأنت جيت ليها
قهوة .

قال :

- أكبر دليل إن كلامك غلط انى جبتلها قهوة .. يا أستاذ أنا عايز اللي يجييلي
قهوة ... هي الماهية بتكفي علشان أجيب قهوة لحد ..أنت عارف إنى كل

شهر بستلف فلوس و.....

قاطعته وقلت :

- مفهوم ... مفهوم ... الحال من بعضه .

مكنتش فاضي لكلامه عن الماهية اللي بتخلص قبل الشهر ، المهم قتلته :

- اللي جات امبارح كانت أنسة يدوبك 22 سنة ، وكانت لابسة جينز وحاطة
برفان واسمها سوزي واستلمت العمل ومشيت ..فاكر .

قال :

اللى جات استلمت العمل امبارح هي جدتك سوزي اللي مرمية جوه دي ...
وسيبني في حالي علشان المدير مكلفني أروح الإدارة انهارده أحضر
اجتماع بالنيابة عنه ... أنت كده هتأخرني .
قال جملته دي ووقف علشان يمشي ، بس وهو ماشي قالي :
- هات سيجارة بقا علشان أنت عصبنتي .

كانت لسه السيجارة اللي ولعها من شوية في ايده ، مديت له علبة السجاير
وسرحت بأفكاري ، الست اللي جوه دي أول مرة أشوفها ، الأستاذ
شماشيري بيكذب ، طيب هيكذب إيه؟! بس ازاي اللي جوه دي هي سوزان
اللى كانت امبارح؟!
كده مفيش حل غير اني ادخل أتكلم معاها وأتأكد ، بس لازم الأقي اي حاجة
أتحجج بيها ، اه ، أسألها إيه رأيها في المكتب اللي جهزناه ليها ، أكيد الكلام
هيجيب بعضه ، شجعت نفسي وقربت من حجرة المكتبة ، الباب مفتوح
كالعادة ، خبطت على الباب بأدب وسمعتها بتقول :
- تفضل .

قلت :

- أتمني يكون المكتب مريح .

قالت :

- اه شكرا .

قلت :

- هو حضرتك اللي جيتي امبارح استلمتي العمل .

بصت لي بصة غريبة وقالت :

- اه ... حضرتك فيه حاجة .

قلت :

- يعني انتي اسمك سوزي سامح شاهين؟

الاستغراب زاد على وشها وقالت :

- هو انا يعني هغير اسمي من امبارح لحد انهارده .

قلت :

- يعني انتي سوزي اللي كنتي امبارح وحاطة برفان و..

قاطعتني في غضب :

- برفان إيه يا أستاذ ... عيب كده .

قلت وأنا متلخبط :

- آسف مش قصدى ، بس انتي امبارح كنتي حاطة برفان ورفيعة أكثر من

.. قاطعتني بعد ما وقفت وقلت :

- لا كده كثير أوي ... أنت ازاي تقول كده .. اطلع بره لو سمحت .

مشيت وأنا ندمان على إني دخلت اكلمه ، الله يخربيتك يا سوزي ، الست تقول عليا ايه دلوقتي ؟ ربنا يستر ومتقولش للمدير ، يانهار ابيض لو عرف الأستاذ شماشيري ، أنا هتفضح ، بس ازاي الست اللي جوه دي هي اللي كانت امبارح ؟!

معقولة تكون هي وأنا اتجننت ، معقولة يكون الأستاذ شماشيري مش بيكذب وكل اللي شفته امبارح كان تهيوأت ؟!

وهنا افكرت حاجة مهمة ، الست اللي جوه عمرها فوق الخمسين ، وأنا معايا الملف بتاعها ، وبسهولة ممكن أعرف تاريخ ميلادها وكل بياناتها ، بسرعة وبلهفة فتحت الدرج وطلعت الملف وقرأت :

- سوزي سامح شاهين أنور ، محل الميلاد والإقامة القاهرة ، تاريخ الميلاد (5 فبراير 1971 م) .

حلو أوي ، احنا دلوقتي فى سنة 2024 م ، والست مواليد 1971 م ، الست تقريبا عندها 53 سنة ، الملف اللي فيه البيانات دي هو اللي أخذته من الأنسة اللي جات امبارح ، طيب ازاي مأخذتش بالي ابص كويس في البيانات امبارح ؟

بس البنت كان جمالها طاغي على كل حاجة ، البنت كانت نظراتها حادة وفيها بريق لامع يسحر اى حد ، وأنا بقلب في الملف شفت صورة من بطاقة الرقم القومي ، هو ده المستند الوحيد اللي فيه صورتها ، الصورة اللي قدامي هي صورة الست اللي جوه .

اليوم مرّ عادى وعلى الساعة 11 مدام سوزي خرجت تروّح لأن شغلها هيكون نص يوم زي ما المدير قالي ، بس وهي خارجة خبّطت على باب المدير ودخلت ، وبعد ربع ساعة خرجت وبصت عليا بقرف ومشيت ، الست زمانها بتقول عليا ذئب بشري عديم الإحساس .

الساعة 2 بعد الظهر مشيت بس مروحتش البيت ، طلعت على بيت شاكر ، أول ما قابلني قالي :

- اه يا نذل .. كده متسألش ؟

بعد ما رحب بيا وشربنا شاي فكرت إني أحكيه كل حاجة ، من أول ما إن سعاد شوقي لسه عايشة لحد سوزي سامح ، بس كنت خايف من سوزي لأنها هددتني إني مجبش سيرة لحد ، علشان كده قلت أنا هلمح وأقول كلام غير مباشر ، قلت :

- هو فرغلى اتسجن ؟

قال :

- اه اتسجن ، لقيوا مراته مقتولة ومرمية في الغيط في طريق الجبل الغربي من الناحية القبالية .

قلت :

- طيب تفكر قتلها ليه ؟

قال :

- الطمع يابني ، الطمع ، وصية أبوها إنها مينفعش تورث إلا لو ماتت أو خلفت ، وهى دلوقتي ماتت ، وفرغلى هيقضى كام سنة في السجن ويطلع يتمتع ب 7 فدادين أرض غير المواشي .

بصيت في ساعتى وقررت إني أمشي بس قلنله وأنا بقف :

- وأخبار نورا إيه ؟

قال وهو بيرمي عقب سيجارته :

- نورا مين ؟

قلت :

- نورا خطيبتك يابني .. إيه هى الحادثة أثرت على عقلك ولا إيه .

رد بسرعة :

- اه كويسة ... كويسة .

استأذنت منه وخرجت ، بس بعد ما طلعت من البيت وقبل ما أركب

الموتوسيكل سمعت أبو شاكرا بيقولي :

- رأفت .

وقفت وسلّمت عليه لانى مكنتش قابلته وأنا داخل ، المهم بص حواليه كأنه

خايف حد يسمعنا وقالى :

- ملاحظتش حاجة غريبة على شاكرا ؟

قلت باستغراب :

- حاجة غريبة ازاي يا عمي ؟

قال :

- الواد تصرفاته غريبة ومش عارف ده بسبب الحادثة ولا إيه الموضوع .

قلت :

- طيب تصرفات غريبة ازاي ؟

قال :

- مرة دخل يعمل لنفسه شاي بالليل وأنا كنت معدى قدام المطبخ وشفته حاطط صباعه على نار البوتاجاز لفترة طويلة من غير ما يتألم ولا يشيل ايده .

قلت وأنا بفكر :

- ازاي بس يا عمي؟! جازي كان بيتهيا لك .

قال :

- طيب وصورته اللي مش بتظهر في المرايه ؟

قلت :

- حضرتك شفت كده بنفسك ؟

قال وهو بي فكر :

- مش بالضبط .. بس مرة كنت قاعد في الصلاة اللي فيها مرايه كبيرة ، وشاكر فات من قدامي وكانت صورته ظاهرة في المرايه عادى ، بس وهو خارج من الحمام فات قدامي ساعتها كنت ببص ناحية المرايه ومشفتش صورته وهو معدى .

قلت :

- صدقني مجرد أوهام يا عمي .

قال وهو شارد في أفكاره :

- حاسس إن الموضوع اكبر من كده ؟

قلت :

- ازاي ؟

قال :

- اللي عايش معنا ده مش شاكر ابني .

الفصل التاسع

لما عمي أبو شاکر قالى ان اللى عایش معاهم ده مش ابنه شاکر حسيت انه بيبالغ ، خاصة ان عمي أبو شاکر راجل متقدم فى السن وعنده مشاكل فى الذاكرة ، شاکر قالى قبل كده ان ذاكرته ضعيفة بسبب سنه ، وکمان نظره الضعيف وصحته المتراجعة بيخلوه ممكن يتوهم حاجات محصلتش .

المهم مشيت بعد ما طمنت عم أبو شاکر ان ابنه بخير ، روحت البيت واتغديت وضبطت المنبه على الساعة 7 مساء ونمت ، الساعة 7 أخذت دش بارد وشربت كوباية شاي وولعت سيجارة ونزلت ، ركبت الموتوسيكل وطلعت على بيت الاستاذ شماشيري ، هو ساكن فى اخر القرية من الناحية الغربية ، اعرف مكان بيته لانه هو من نفس قرיתי بس دى اول مرة ازوره فى البيت ، خبطت على الباب لحد ما فتح وشافني وقال :

- الاستاذ رأفت !!! تفضل تفضل .

دخلت البيت وقعدت ، بصيت حواليا فى الصالة اللى قعدنا فيها لقيت كل حاجة مكرکبة ، هو سابني ودخل لجوه أكيد ناحية المطبخ وقالى :

- هعملك كوباية حلبة انما ايه .

قلت فى نفسي : — حلبة !!!

بس رجعت وقلتله :

- متتعيش نفسك يااستاذ شماشيري انا مش هطول .

قال :

- ياسيدى ولا تطول ... احنا ورانا ايه ... المهم معاك سجاير .

قلت وانا بحط علبة السجاير على المنضدة المكسورة قدامي :

- معايا .

غاب شوية فى المطبخ كنت تأملت فى كل حاجة فى الصالة وحسيت ان الراجل عایش من غير مراته وعياله ، استحالة البيت ده تكون فيه واحدة ست والكرکبة دى موجودة ، قلت فى نفسي :

- جايز تكون مراته مسافرة ولا غضبانة ، وبعدين وانا مالي اصلا .

المهم الاستاذ شماشيري رجع بعد شوية ومعاه صونية عليها كوبيتين فاضيين وكنكة طالع منها البخار وعلبة سكر جمبها ملعقة ، حط الصونية قدامي جمب علبة السجاير وقام بصب الكنكة فى الكوبايات ، وفتح علبة السكر وشفط صورصار كبير طلع من علبة السكر ، الاستاذ شماشيري ضرب الصرصار بالملعقة والصرصار هرب بعيد ، وقالى :

- كام معلقة سكر ؟

قلت :

- مش عاوز .. انا مبشربش الحلبة .
قال وهو بيغرف سكر بالمعلقة ويحط فى الكوباية اللى قدامي :
- عليا الطلاق لا يمكن ... لازم تشرب .
قلت :
- ولادك فين ؟
ضحك ضحكة طويلة لدرجة ان الكوباية تهزت وهو بيشررب وقال :
- ولادى؟! انا مش مجوز .
صدمتني المعلومة وقلت :
- يعنى انت عمال تنصح فيا اتجوز وانت مش مجوز
قال :
- علشان كده بنضحك .. مش عاوز الدنيا تاخذك والعمر يجري بيك لحد ما
توصل للخمسين زيي من غير جواز .
مد ايده ناحية علبة السجاير واخذ واحدة وقال وهو بيولعها :
- عارف ... انا هموت هنا لوحدى .. ومحدثش هيعرف اني مت الا لما ريحتى
تطلع .
قلت :
- ربنا يبارك فى عمرك يااستاذ شماشيرى .
مسك كوباية الحلبة الثانية وقدمها لي وقال :
- اشرب .. اشرب يا استاذ .
اخذت منه الكوباية وحطيتها تانى على المنضدة وقلت :
- ركز معايا وقولي كل اللى شفته لما جات سوزي اول يوم .
قال :
- سبحان الله .. مش انت كنت معانا وجهزت لها الورق .
قلت :
- كنت ... بس عايز اسمع منك كل اللى شفته .
قال :
- الساعة 9 ونص دخلت مدام سوزي و...
وقبل ما يكمل قتلته :
- اوصفها .
بص ليا بصة فيها اتهام وقال :
- يا لنيم .
قلت :
- طيب بص ... اللى جات اول يوم .. هى اللى جات انهارده

قال :

- اه هـى .

قلت :

- طيب كمل .

قال :

- هى جات وقالت المدير موجود ...وانت قتلها اه موجود بس نقوله مين وهى قالت انا مدام سوزي ..انت دخلت عند المدير من غير ما تخبط على الباب .. وانا سمعت المدير بيهزقك جوه ... و انت خرجت من عنده وشك احمر ..وجهزت الورق لمدام سوزي وقتلتها تروح عبال ما نجهز لها مكتب فى اوضة المكتبة وكمان قبل ما تمشى حلفت عليها تشرب حاجة وجريت بره وجبتلها فنجان قهوة بنفسك .

قلت :

- احلف ان ده اللى حصل .

قال :

- أقسم بالله هو ده اللى حصل .

قلت :

- وانا حلفت عليها ما تمشى الا لما تشرب حاجة وجبتلها القهوة بنفسى
وقالتلى ميرسى يا استاذ رأفت

قال :

- طيب ما انت فاكر كل حاجة اهو يا لئيم ... بس ليه كنت مهتم بيها اوى
كده رغم انها قد جدتك

والاستاذ شماشيرى مكلش كلامه لانه فجأة وقف ومسك الشبشب وجرى
اخر الصلاة ولما وقفت اشوف حصل ايه لقيته عمال يموت فى الصرصار

رجعت البيت ورميت نفسى على السرير وسرحت فى كل كلمة قالها لى
الاستاذ شماشيرى ، وفجأة افكرت اللى قاله لى عمى أبو شاكى ، واخذت
بالى من حاجة مهمة ، لما سألت شاكى عن خطيبة نورا قالى نورا مين ،
طيب فيه واحد ينسى اسم خطيبته ، المهم ان جملة عم ابو شاكى (اللى
عايش معنا ده مش ابنى شاكى) ، الجملة دى فضلت تترد فى عقلى مش
عارف ليه ، وافكرت الشخص اللى جه زارنى فى البيت وأكل معايا سمك
وطلع مش شاكى ، الله يخربيتك يا سوزى خلتينى اشك فى كل الناس .

تاني يوم رحت الشغل ، وانا طالع السلم شافني عم شعبان وهو واقف فى البوفيه ، جري ناحيتى وقالى :

- المدير قالب عليك الدنيا يا بيه ، شكلك عملت مصيبة .

مردتش عليه وطلعت على السلم بس سمعته بيقول :

- مش ناوي تتجوز بقا يا أستاذ رأفت هها هها .

دخلت المكتب ولما شافني الاستاذ شماشيري قالى :

- اخيرا شرفت ، قبل ما تقعد روح شوف المدير بسرعة .
قلت فى غيظ :

- ماله المدير ... عايز مني ايه ؟

قال :

- علمي علمك ..بس سأل عليك عشرين مرة .

خبطت على باب المدير وسمعته بيقول :

- تفضل .

دخلت لقيته بيتكلم فى التليفون ولما شافني أنهى المكالمة بسرعة وقالى :

- تقدر تقولي يا استاذ ايه اللي عملته ده .

فضلت أقلب فى دماغي انا عملت ايه بس مفكرتش اى مصيبة انا عاملها

على الاقل فى اخر شهرين ، قلت :

- عملت ايه يا بيه !؟

قال وهو بيقف :

- اه مش فاكر طبعا .. من كتر مصاييك اللي بتعملها مش فاكر انت عملت

ايه .

قلت :

- يافندم انا بعمل كل اللي بتطلبه مني .

قال :

- انا مش بتكلم عن الشغل انا بتكلم على اللي عملته مع مدام سوزي يا

مراهق .

يانهار ابيض ، دا شكلها مدام سوزي نيلت الدنيا خالص ، مدام سوزي ،

ومراهق ، بيقى الدنيا باظت .

المدير كمل كلامه :

- واحد فى سنك عمره 35 سنة يعاكس زميلته ويقولها لازم تخسي هتبقى

احلي .

تخسي !!! وهتبقى أحلى !!!

قلت :

- انا مقلتش كده يافندم .

قال وهو بيلف حوالين الكرسي اللي انا قاعد عليه :

- عارف انك قلت كثير ، بس ده اللي انا فاكره من اللي قلته .

حاولت اقف علشان اشرح اللي احصل بس لقيته حط ايده على كتفي وقالى

:

- اقعد يا مراهق ، كمان ليك عين تقف وتبص فى وشي يا محترم ، عشنا
وشفنا ، موظف يعاكس زميلته وينصحها انها تخس ، انت مالك تخس ولا
تنتيل ، انت هتتجوزها ، دى قد جتك يا محترم ، مش مستوعب ان حد من
الموظفين عندي يعمل العملة السودا دى ، لو الوزارة عرفت يبقي منظرى
ايه قدامها .

قلت بسرعة :

- يافندم انا ...

قاطعني وهو بيقول :

- اخرس يا مراهق ، ما تتجوز يا أخي بدل ما عمال تعاكس فى زميلاتك
كده ، جيل اخر زمن ، فين جيل الادب والاخلاق ، بس هقول ايه ، ما انتو
بستمعوا (لولاكي) و (جللجلى جلجلة)

يانهار ابيض ، هو لسه عايش فى ايام (لولاكى) بتاعت (على حميدة) ،
او مال لو عرف ان فيه تيك توك هيقول ايه ، المهم حاولت ادافع عن نفسي
واقوله انى كنت ملتبخط بينها وبين واحدة تانية لكن المدير كان متعصب
اوي ومكنش فيه فرصة ارد عليه بسبب عصبيته ، بس فى الاخر قالى :

- انا هتحفظ على شكوى مدام سوزي بشرط انك تعذرلها وتطيب خاطرها .
قلت :

- ربنا يكرمك يا فندم ، انا مستعد أبوس راسها كمان .

المدير لما سمع الجملة دى نط فى الهوا مترين وقالى :

- تبوس !!! تبوس !!! يعنى انت أما انك تعاكس او تبوس .

قلت بسرعة :

- يافندم مش قصدي ، انا قصدى بس انى هصالحها بالطريقة اللي ترضيها
قال :

- خلاص تصالحها من غير بوس .

قلت :

- حاضر يا أفندم .

وقبل ما اخرج من مكتب المدير سمعته بيقولى :

- يا أستاذ رأفت ، لما تحب تلفت نظر واحدة لازم تكون شيك فى تعاملك معها و...

هنا بقا قاطعته وانا متغاض وقلت :

- يا أفندم ألفت نظر مين ؟ دى قد جدتي .

قال بسرعة :

- ما هو ده اللي هيجنني .

اعتذرت لمدام سوزي والموضوع انتهى ، بس اكتشفت ان عم شعبان والاستاذ شماشيري ومشرف الانشطة عرفوا بالموضوع ، كبرت دماغي وعدى اليوم وروحت .

على الساعة 7 بالليل خرجت كنت معزوم فى فرح واحد من القرية ، وبعد الفرح رجعت البيت الساعة 10 بالليل ، فتحت الباب بالمفتاح وولعت نور الصالة وقفلت الباب ، وبصيت كده ناحية التليفزيون شفت واحدة قاعدة ، شفتها من ظهرها كانت باصة ناحية التليفزيون ، الدم اتجمد فى عروقي ، ورجعت ناحية الباب علشان افتحه واهرب بس المفتاح وقع من ايدي ، كنت عايز اهرب قبل ما تشوفني ، بس شفتها بتبص ناحيتي وبتقولى :

- ازيك يا جميل .

كان شعرها اسود ووشها مدور ولايسة جينز ولاحظت ان الصالة اتملت بريحة برفانها ، قلت وانا بترعش :

- سوزي !!!

الفصل العاشر (الأخير)

كنت مرعوب وخايف ومش مصدق اللي شايفه لما لقت سوزي فى بيتي ،
بدأت اهدي شوية خاصة انها فضلت تطمني وتقولي :
- متخفش .

قعدت على الكنبه المقابله لها واستنيتها تتكلم فقالت :
- مكنش المفروض اقابلك انهارده ، بس جاتلى الاوامر انى لازم أمشى
الساعة 12 بالليل .

قلت :

- تمشى ؟!!! تمشى تروحي فين ؟

قالت :

- أشلول .

قلت :

- أشلول ايه دى اللي مش لاقى لها مكان ، وايه الاوامر دى ، يعنى انتى
جيتى لخبطتي حياتي وعايضة تمشى من غير ما اعرف انت ايه وبتعملى كل
ده ليه .

حطت رجل على رجل وقالت :

- تحب ابدأ منين ؟

قلت :

- تحكي كل حاجة .

قالت :

- طيب انت معندكش شاي ولا ايه ؟ اللي اعرفه انك كريم .

وقفت ومشيت ناحية المطبخ وانا بقول :

- بس اوعى تختفي ، انا فاهم الحركات دي .

قالت وهى بتضحك :

- متقلقتش .

جبتلها عصير وقدمته ليها وقعدت ، وهى بدأت تتكلم وقالت :

- حكايتنا بدأت يوم 12 أكتوبر سنة 1992 م ، وبالتحديد الساعة 3 و 9

دقايق العصر .

قلت :

- حكايتكم ؟!! حكاية مين ؟

قالت :

- حكاية أشلول ، وحاول متسألش كثير وتقاطعنى علشان الساعة 12 هختفي

.

قلتلها :

- ماشى ، كملى .

قالت :

- هو التاريخ ده بيفكر كده بحاجة .

فضلت افكر ايه اللي حصل يوم 12 اكتوبر سنة 1992 م ، بس انا ساعتها

كان عمري 3 سنين ، علشان كده قائلها :

- بيكرني باحلى ايام ، ايام طفولتي .

ضحكت وهى بتقول :

- دا يوم الزلزال الشنيع اللي حصل فى مصر ، ميصحش متنكش عارفه ،

انت متعلم وشغال فى وزارة الثقافة .

قلت :

- أوعدك اني هحفظ تاريخ الزلازل والبراكين فى العالم كله علشان يعني لو

قابلتني عفريته تانى ابقى مثقف قدامها .

قالت :

- عامة انا مش هعلق على تريفتك دى علشان مش وقت تعليق ، خاصة اني

دى هتكون اخر مقابلة بينا ومش هتشوفني تانى للابد .

وبعد ما قالت الجملة دى سكتت شوية وانا كمان سكت بس قالت :

- مالك زعلت ؟

قلت بسرعة :

- انتى هتزعلىنى بالعافية ، مش زعلان ، انتى بس سافرى أشلول بتاعتك

دى ومتخافيش على زعلي .

قالت :

- يوم الزلزال فيه جزء كبير من المقطم وقع لتحت واتحشر تحت مكان

مسدود ، كنا متوقعين ان فرق البحث والانقاذ هيوصلوا لينا ، بس فات يوم

وأيام واسابيع وشهور ، كان عددنا 250 ألف شخص ، رجاله وستات

وشباب وبنات واطفال ، نصحننا رجل كبير أننا نتأقلم ، بس كان التأقلم

صعب ، تخيل العدد الكبير ده من الناس محبوسين فى ممر ، لحد ما جه

اليوم والصخرة اللي كانت بتسد الممر من الناحية السفلية وقعت ، ولقينا

نفسنا فى عالم تانى مليون زروع وخضروات وأكواخ وميه وحيوانات ،

وشفنا السما ، ساعتها اعتقدنا اننا رجعنا منطقة المقطم تانى ، بس المنطقة

دى مش زى المقطم ولا تشبه اى حته فى مصر ، المنطقة كانت حته من

الجنة ، لدرجة ان فيه ناس اعتقدوا اننا متنا ودخلنا الجنة ، ساعتها انا

مكنتش اتولدت ، بس خلاص مع الخير اللي لقيناه فى المنطقة نسينا

موضوع العودة ، خاصة ان استحالة فرق الانقاذ تكون لسه بتدور على

مفقودين لحد دلوقتي ، ولاحظنا ان البحيرة الوحيدة الموجودة فى المنطقة مكتوب عليها بحيرة أشلول ، والبحيرة دى هى كانت سر بقائنا وسر وجود الزروع والحيوانات ، علشان كده سمينا نفسنا مدينة أشلول ، ايوه بقينا مدينة فيها مدارس ومستشفيات وكنا نركب الدواب لحد ما اخترعنا وسائل مواصلات ، هى مش حديثة زى هنا بس اهو حاجة تؤدي الغرض ، ومنتساش اننا المدينة مساحتها مش كبيرة يعني علشان نحتاج لقطارات ، بس برعنا فى حاجات كثير ، أهمها السحر ، لدرجة ان السحر أصبح مادة بيتعلموها الاطفال عندنا فى المدارس ، يعني موضوع اني أغير شكل مدام شكل سوزي قدامك أنت بس فى حين ان الاستاذ شماشيري كان شايفها مدام سوزي الست البدينة الكركوبة ، دا موضوع سهل يعمله عيل صغير من عندنا و...

قاطعتها :

- استنى ، يعنى اللى جات اول يوم الشغل كانت مدام سوزي الست البدينة ؟
قالت :

- ايوه هى ...بس انت الوحيد اللى شفتها مش سوزي ، انا خليتك تشوفنى انا بدلا منها .

قلت :

- بس الاستاذ شماشيري قالت انى انا اللى جبتلك قهوة .

قالت :

- وفعلا انت اللى جبتلى قهوة بس انا خليتك تتوهم ان شماشيري هو اللى جاب القهوة وهو اللى دخل للمدير يعرفه بوجودى ، المهم بلاش تقاطعني علشان الوقت .

قلت :

- ماشي ، كملى .

قالت :

- الاجيال اللى موجودة دلوقتي فى أشلول بتعتبر موضوع اننا كنا عايشن فى المقطم مجرد وهم ، لحد ما مجموعة من المفكرين اقترحوا عمل ابحاث عن العالم اللى كنا فيه قبل الزلزال ، بس كان لازم حد يقوم بالمهمة دى ، مهمة السفر للمقطم ، وتقدمت انا و14 بنت ، وكنت انا الاولي ، والمهمة كانت واضحة ، اعيش فى جسم اى واحدة واسجل كل ملاحظاتي ، بس من سوء حظى انى سكنت جسم ميرفت محسن ، وميرفت تقتلت وانا فى جسمها ، لو ماتت موة طبيعية كنت حررت نفسى منها ساعة الدفن ، لكن علشان انتقلت كان لازم حد يحررني ، وشفتك فى ليلة راجع

بالموتوسيكل ، ساعتها كان فرغلي بيرمي ساعة جمب جثة ميرفت ،
فرغلي كان عارف ان المقتولة دي تبقي ميرفت و ...
قاطعتها وقلت :

- طيب سؤال معلش لو مفيش خطر على حياتك يعني .

هزت راسها علشان اسأل ، فقلت :

- فرغلي كان عارف المقتولة تبقي ميرفت ، ليه راح ريمي ساعة هناك ؟
وليه مقلش للحكومة ان المقتولة تبقي ميرفت مش مراته

قالت :

- لانه هو عاوز كده ، هو عاوز الحكومة تعتقد ان المقتولة تبقي مراته
علشان يورثها ، بس فى الحقيقة مراته عايشة فى قرية غرب الجبل ، وكان
ناوى ياخذ الورث ويبيعه ويرجع لمراته ويسافروا يعيشوا فى اسكندرية ،
بس الموضوع لما قلب بجد هو اتورط ، علشان كده كان بيقول لبهاء بيه
أثناء التحقيق الموضوع كان هزار يابيه ، وبهاء بيه قالك ساعتها ان فرغلي
برىء من القتل ، بس انت مصدقتش و عملت فيها محقق وقلت القضية
انتهت .

قلت :

- طيب ليه انتى مسبتنيش اقول لبهاء بيه ؟

قالت :

- لان الموضوع مش تبع مهمتى ، والحكومة مع الوقت هتكتشف الموضوع
لما تظهر سعاد شوقي .

قلت :

- طيب كملي .

قالت :

- المهم المكان اللي تفتلت فيه ميرفت محسن كان مكان مقطوع محدش
بيعدى فيه ، علشان كده انا تجسدت فى شكل شاكر وجيت زروتك ، وعلى
فكرة تسلم ايدك على اكلة السمك الحلوة دي .

هنا انا ضربت جبهتى بأيدى وقلت :

- انتى اللى أكلتى معايا سمك ، طيب وليه دخلتى شاكر فى الموضوع ؟

قالت :

- لانك كان لازم تعرف ان فيه ست اسمها سعاد شوقي مقتولة ، علشان لما
تشوف الراجل فى الغيط تشك انه جوز سعاد ، وعلشان اعرف انا العب

دور سعاد معاك واخليك تروح تخلص جثتها واتحرر انا ، على فكرة انت لو تأخرت يوم واحد عن كشف جثة ميرفت كنت هموت ، لاني لو سكنت جسم واحدة واتقتلت لازم اتحرر قبل 30 يوم من ليلة مقتلها .
قلت :

- بس كان ممكن انتى تظهرى فى شكل ميرفت وتخلينى انقذك .
ضحكت وهى بتقول :

- ميرفت ملهاش ذكريات سابقة فى عقلك يااستاذ ، وانا كان لازم اعمل ذكريات فى عقلك عن سعاد عن طريق ان شاكر (اللى هو انا) يحكيك عنها .

قلت :

- كملى .

قالت :

- كان المفروض ارجع أشلول بعد شهر ، بس من ساعتين وصلتتى أوامر من الدكتور نبيل انى لازم ارجع الليلة الساعة 12 منتصف الليل خاصة ان دى ليلة قمرية .

قلت :

- والدكتور نبيل هو صاحب فكرة ارسال حد للمقطع .

قالت :

- شاطر .

قلت :

- كملى .

قالت :

- خلاص ، مفيش تكملة ، انا وضحتلك كل حاجة كنت علوز تعرفها .

سألته :

- وشاكر ؟

قالت :

- متقلقش ، الساعة 12 بالضبط لما ارجع أشلول ، شاكر هيرجع لطبيعته

قلت :

- يعنى عم ابو شاكر كان عنده حق ، وان اللى قاعد معاها ده مش شاكر .

قالت :

- يا حبيبى انا اللى قاعدة معاها بجسم شاكر من ساعة الحادثة ، وانا اللى كنت بقابلك لما كنت بتزور شاكر ، فاكر طيب لما سألتنى عن نورا خطيبة شاكر ، كان ممكن تكشفنى ساعتها .

قلت :

- يعنى انا لما زرت شاكر اول مرة بعد الحادثة وكان متجسس كنتى انتى ؟

قالت :

- أيوه وساعتها قلتك بلغ الشرطة .

قلت :

- ولما سألت شاكر عن خطيبته نورا كنتى انتى شاكر ؟

قالت :

- شاطر .

ساعتها سمعت حد بيخبط على الباب ، اتفرعت وقاتلها بسرعة :

- استخبي الله يخربيتك ، الناس لو عرفوا ان فيه بنت حلوة معايا هنا فى

نص الليل هتفضح .

فضلت تضحك وتقول

- متخفش افتح انت بس الباب .

قلت :

- افتح ايه ؟ ادخلى استخبي فى الاوضة اللي جوه بسرعة واوعى تتلكمى .

قالت بسرعة :

- هنتفتح الباب ولا اروح افتحه انا

الشخص اللي بيخبط كان قرب يكسر الباب من التخبيط ، جريت ناحية

الباب وفتحته ولقيت عم شكري واقف بغضب ويقول :

- ايه ؟ انت مت ولا ايه ؟

كنت سادد الباب بايدى علشان ميشفهاش بس عمر شكري دفعنى لجوه وقال

ودخل وهو بيقول :

- مالك ملتخبط كده زى اللى مدارى حريم عندك .

كانت ركبي بتخبط فى بعضها بس لما دخل عم شكري لقيت فتاة أشلول

تحولت للاستاذ شماشيري بلحمه ودمه ، بلعت ريقى وقلت :

- ايه ياعم شكري ، قاعد مع الاستاذ شماشيري بنتكلم فى موضوع ، مالك

بقا ؟ فيه ايه ؟

قال :

- انا جاي اشكيلك من طلعت ابن عبد البر ، البقرة بتاعته كل يوم الاقيها

واكلة الرزق بتاعى وانا مش عاوز اتهور عليه وضربه اجيب اجله .

قلت وانا ملتخبط ومرتبك :

- دا وقته يا عم شكري ، جاي تشكىلى من طلعت والقرة بتاعته الساعة 12

بالليل .

عم شكري بص للاستاذ شماشيري اللي هي فتاة أشلول وقال :

- يرضيك يااستاذ اللي بيعمله طلعت واد عبد البر ؟

فتاة أشلول قالت بصوت الاستاذ شماشيري :

- لا ميرضنيش ، واوعدك بكرة من النجمة هنكون انا والاستاذ رأفت عند طلعت عبدالبر ونوقفه عند حده .

عم شكري فرح اوى بالكلمتين دول وقال :

- هو ده الكلام يااستاذ ، ربنا يعمر بيتك ، شايف يااستاذ رأفت الناس اللي

بتفهم ، بس عارفين لو طلعت مجبهاش البر اقسم بالله ما هسيبه الا فى

المركز .

المهم شكري مشي والحمد لله ، قفلت الباب وراه ولما رجعت لقيت فتاة اشلول رجعت لشكلها وجمالها وشعرها الاسود الجميل وعيونها اللي بتلمع من كتر الذكاء وقالت وهي واقفة :

- اشكرك يا استاذ رأفت على كل حاجة عملتها معايا ، دلوقتي الساعة 12 أنا تأخرت .

مكنتش عارف اقول ايه ، بس لقيتها بتمد ايدها علشان أسلم عليها ، كانت بتبص بنظرات مش عارف تفسيرها ايه ، كنت فاتح فمي وباصص ناحيتها ومش عارف اقول ايه ، والمفروض يتقال ايه فى الموقف ده ، بس سمعتها بتقول :

- ايه مش هتسلم عليا ، عامة حياتك خلاص رجعت لطبيعتها ، وشاكر رجوع شاكر ، ومفيش بنات هتغلس عليك تانى فى الرسائل والمكالمات .

مديت ايدي وسلمت عليها وحسيت بدقات قلبي بتدق بسرعة بس مكنش بسبب الخوف كان بسبب حاجة مش عارفها ، كنت حاسس انى واخذ مخدر ، وتهيألي انى شفت دمعة بتنزله من عينيها ، مش عارف انا شفت الدمعة بجد ولا الموقف خلانى اتخيل كده ، كل ده وايدها فى ايدي وانا مش واخذ بالي بس حسيت وهي بتسحب ايدها من ايدي بهدوء ، واخر كلمة سمعتها منها :

- أتمنى تكون حياتك أفضل من غير فتاة أشلول .

وبعدها اختفت ، واختفت معاها ريحة البرفان للأبد .

فاتت ساعة وانا حاطط راسي بين ايدي الاتنين وقاعد على طرف الكنبة اللي فى الصالة ، بعدها قمت جهزت لنفسى الاكل بس مأكلتش ، رجعت الاكل للمطبخ تانى ومسكت التليفون واتصل بشاكر وقتلته :

- شاكر .. انت كويس

قال :

- متصل بيا الساعة 1 بالليل تقولى انت كويس .
قلت :

- طيب ممكن اكلم والدك .
شاكر استغرب فى الاول بس لما قتلها انى عايز اسلم عليه خلانى اكلمه
قلت :

- عم ابو شاكر اسمعنى كويس ، انا كلمت دكتور مشهور اوى وقتله حكاية
شاكر انه متغير من بعد الحادثة وصورته مش بتظهر فى المراية ، قالى ان
كل ده طبيعى وهيرجع لطبيعته بعد 30 يوم من الحادثة الساعة 12 بالليل
..عايزك دلوقتى من غير ما شاكر ياخذ باله تمسك اى مرايه وتوجهها
ناحيته وتشوفه ظاهر ولا لاءه ، وكمان عايزك تولع عود كبريت وتعمل
نفسك انه وقع منك عليه وتشوف هيتألم ولا لاءه ، الدكتور مستنى ارد عليه
الليلة ياعم شاكر ، تفضل ادى شاكر التليفون اكلمه واعمل اللى قتلتك عليه
وبعدها هطلب من شاكر اكلمك تانى .
وفعلا عم ابو شاكر ادى التليفون لشاكر وفضلت اتكلم معاه وسألته :
- خطيبتك عاملة ايه ؟

قال :

- الحمد لله بخير ..بكرة رايح ازورها .
قلت :

- هى اسمها ايه بجد علشان بنسى اسمها
قال :

- نورا يابنى ما انا قتلتك قبل كده .
قلت :

- معلش نسيت ياشاكر ، واعى انت كمان تنسى اسمها
قال وهو بيضحك :

- فيه حد ينسى اسم خطيبته ... يالا شحد حيلك انت كمان علشان نفرح فيك .
وبعدها سمعت شاكر بيتألم كأنه اتلسع وبعدها سمعته بيقول :
- معلش رأفت ، اصلى والدى وهو بيولع سيجارة وقع منه عود الكبريت
على رجلى ولسعنى .
قتله وانا بضحك :

- طيب هات والدك اسلم عليه قبل ما اقفل ، ولما كلمت والد شاكر قالى :
- كله تمام يا رأفت ، كله تمام .

قفلت معاهم وقررت انى انام ، اخدت دش بارد ، بس وانا ماشى فى الصلاة
ناحية اوضة النوم شفت جواب مرمي على الكرسي اللى كانت قاعدة عليها

فتاة أشلول ، الجواب لما مسكته شميت ريحت البرفان بتاعها ، فتحت الجواب وقرأت :

- الدمعة اللي شفتها فى عيني دمعة حقيقية مش وهم ، ما انا عادى ليا مشاعر زي اى بنت ، لو انت كمان فى يوم من الايام افكرتني وحسيت بدمعة بتنزّل من عينك ، يبقى تروح المقطم تدور على صخرة صغيرة مكتوب عليها بخط صغير اوى (أ . ش) ، دى اختصار أشلول ، والحروف دى مش بتظهر الا كل ليلة قمرية من كل شهر ، ولما تلاقي الصخرة حاول تحركها ، هتلاقي تحتها حفرة هتوصلك لسرداب ، اخر السرداب هتلاقي نفسك فى مدينة أشلول ، مش هقولك مكان الصخرة فين بالضبط ، علشان مش حابة تلاقيها بسهولة ، عوزاك تتعب وانت بتدور عليا علشان اعرف ساعتها ياترى انا استاهل انك تتعب علشانى ولا لاءه .
تحياتي : فتاة أشلول .
الغريب بعد ما خلصت الرسالة حسيت بدمعة نازلة من عيني .

تمت بحمد الله .

يمكنكم متابعة الجزء الثاني من الرواية بعنوان (السفر إلى أشلول) من خلال صفحتي الشخصية على فيس بوك .